

純
常
子
枝
語

種族之一派清創業時以其同族編入旗籍是則然矣
又云或稱魚皮套子或稱長髮子漢人賤之之辭

滿洲地誌云高句麗始祖朱蒙諡東明北史朱蒙其俗

善射滿洲源流考滿洲語稱善射曰卓琳莽阿チヨリンモンア或卽朱

蒙之急呼訛其音云余謂古譯簡今譯繁愛新覺羅必

新羅之詳譯也此說蓋亦可證

袁子才隨園隨筆

卷二

云漢軍之名始見于宋史劉廷

慶傳遼將蕭幹擒獲糧將王淵得漢軍二人蔽其目留

帳中夜半僞相語曰聞漢軍十萬壓吾境吾師三倍敵

之有餘此蓋遼稱宋軍爲漢軍也金史兵志伐宋之役

參用漢軍及諸部落而統以國人

明王弇州讀元史

讀書後卷五

云其君臣斷然思以其教易

中國之俗省臺院寺諸路之長非其人不用也進御之
文非其書不覽也名號之錫非其語不爲美也天子冬
而大都夏而上都上都漠北也其葬亦漠北視中國之
地若甌脫焉不得已而居之於中國之民若贅疣焉不
得已而治之又若六畜焉食其肉而寢處其皮以供吾
嗜而已於乎不亦天地之至變不幸者哉弇州之議蒙
古當矣顧謂匈奴鮮卑氏羯忘其故是以易世輒盡元
不忘其故是以易世之後至今不絕則未窺其本也劉

淵石勒諸人雖起羌胡而久居中國其未起也固無大
漠之可惡其既亡也亦未必種人之頓盡特與齊民雜
處不復能分別而已元則拓地廣遠氣力雄厚自太祖
太宗以來所滅者數十國其視金也宋也與欽察斡羅
思花剌子模之屬無以異也其治屬地之例久有成規
又非因滅中國之後而始異其政策也弇州知其視中
國猶甌脫不知此正順帝棄之之易而明所以得之之
不難也後魏無代郡之可歸金源無混同之可避而元
猶有北庭萬里雄長自如此明之兵威不振而不能犁
庭掃穴耳豈繫於元人之不忘故俗哉弇州此論述之

者多故聊爲正之

呂氏春秋云客有以吹簫見越王者上下宮商和而越王不喜也或爲之野者而王反說之新論云越王退吹簫之音而好鄙野之聲吳越王之越歌猶用句踐之故智也

釋贊甯僧史略卷云東晉何充始捨宅爲寺安尼其間不無神異義解道明之者雄飛傑出矣宋寶賢爲京邑尼僧正文帝四事供養孝武月給錢一萬尼正之俸寶賢始也

姚秦命僧習爲僧正秩
同侍中是僧正之始

朱儒注經多用釋家句語余曾論之日本太田元貞疏

證宋儒雜語曰虛靈不昧出大智度論明鏡止水出圓
覺經事理對言出華嚴法界觀體用一源顯微無間出
華嚴大疏余謂宋儒用佛理說經此不必諱用佛理而
又立說以攻佛則似可不必也

李西涯麓堂詩話云嘗聽人歌關雎鹿鳴諸詩不過以
四字平引爲長無甚高下緩急之節意古之人不徒爾
也按朱子以關雎鹿鳴十二詩譜編入儀禮經傳通解
豈明時尙有能歌之者故西涯得聽之耶

唐吳兢樂府古題要解云漢孝和帝時王渙爲安定太
守人思其德立祠帝事黃老之道悉毀諸神廟惟渙及

卓茂廟存焉是黃老之道亦毀雜祠

南天鐵塔之事世多疑之龍樹菩薩所著各書亦未有言之者故世人於密宗往往疑焉然鳩摩羅什所譯龍樹菩薩傳云更求異經都無得處遂入雪山山中有塔塔中有一老比丘以摩訶衍經典與之此則大乘之法龍樹得之於塔中也又更求餘經大龍菩薩接之入海發七寶華雨以諸方廣等深奧經典無量妙法授之此則方等諸經龍樹得之於海底也其不言鐵塔呪術者或時節因緣未至故作傳者略之然又云龍樹亦因呪術化作六牙白象行池水上則龍樹固密教之宗祖矣

沈明遠寓簡卷七云西方聖人之書十二部大典之外
有雪山如來梵天蓮華仙人南天竺所說書吉祥疏勒
天龍天音聲人非人苦活不飲酒地居天金剛未曾有
諸仙苦行觀地觀虛空一切藥草因總覺西園草陀典
其名雜見諸經又數百品皆未至中華其間必有說妙
法者近世取經來南洲者絕不問問恨未盡見也余讀
釋典亦往往留意諸經之未來者如阿毘達磨順正論
第六十九引藍薄迦經瑜伽師地論卷十三引盪塵經
六十七引伐他迦經六十八引乞食清淨經八十一引
鸚鵡經彌勒所問經論第二引娑伽羅龍王經陳眞諦

譯四諦論卷一引婆羅訶馬王經隋達磨多譯緣生

論引迦旃延經說

善即迦旃延所結集者

正見及空見破邏具膩

經

注張

均未見譯本

中國物產自外國來者今據段公路北戶錄記之 占

卑國出偏核桃形如半月狀波斯人取食之絕甘美極

下氣力比於中夏桃仁療疾不殊會最云偏桃仁勃律

國尤多花殷紅色即中解忠順使安西以蘿蔔插接之

而生桃仁肥大其桃皮不堪食 貞觀二十一年康國

獻金銀桃詔令植於苑圃 迷迭香大秦出 艾納出

驃國 指甲花細白色絕芳香今番人重之但未詳其

名也又耶悉弭花白末利花

紅者皆波斯移植中夏如

毗尸沙金錢花也本出外國大同二年始來中土愚按

末利乃五印度華名佛書多載之貫華亦佛事也耶悉

弭卽野悉茗

太平廣記

四百一

菜之菠薐者本西國中有僧自彼將其

子來如苜蓿蒲萄因張騫而至也菠薐本是頗陵國將

來語訛耳

出嘉話錄

困學紀聞

二

唐西域傳末祿有軍達泥

婆羅獻波稜皆菜名

原注張文潛謂波稜自波陵國來

按末祿在大食

國東軍達菜今廣東有之俗名豬婆菜

咳餘叢攷西瓜始于五代條云歐陽公五代史記四夷

附錄胡嶠居契丹七年自上京東去四千里至眞珠寨始食茱明日始食西瓜土人云契丹破回紇得此種以牛糞覆棚而種大如中國東瓜而味甘楊用脩云余嘗疑本草瓜類不載西瓜後讀五代胡嶠陷虜記云嶠於回紇得瓜種結實大如斗名曰西瓜則西瓜由嶠入中國也

按拾遺記燉煌瓜疑卽西瓜亦見廣志未必至五代始有也

廣東新語云羊桃其種自大洋來一曰洋桃樹高五六丈大者數圍花紅色一帶數子七八月熟色如蠟一名三斂子斂稜也俗語訛稜爲斂也余按粵之羊桃偶與養楚同名不可混爲一種羊桃與三斂甘酸迥異三稜

見吳都賦注亦與此別

宋徐兢宣和奉使高麗圖經卷四十曰高麗稟受正朔
遵奉儒學樂律同和度量同制古人所謂書同文車同
軌者於今見之是知當時朝鮮未有諺文日本人誤李
禎爲里土而以爲唐人者眞失之不老也

湯脩業賴古堂文集錢鏐菴東林紀事序云明史經數
十巨公之手參訂數十年與元史數月而成迥異而荆
溪史南如司馬著藕莊文鈔辨其族祖史夏隆於康熙
丙子卒於家年近九十而明史則載其死節蕭山張君
風林螺江日記亦駁正明史數條鮑臆園手札云攷據

之學豈但往古難徵卽以近時論實錄重大之事咸豐
末年國史館補繕宣宗實錄一分借出當日恭閱稿
本康與校最多如文孔修相國謚文端數年前事耳錄
中作文莊經纂修校對提調總裁數十人之目未曾更
正卽與列傳不符又如兵部朋馬奏銷某總裁簽出云
朋疑作棚提調卽加籤云遵改康在閣中頻見提本朋
何嘗作棚乎又如朝鮮國王李昇康年年票擬彼國奏
本所見多矣錄中誤作昇翁相國簽云昇字恐誤提調
卽加簽云遵改作昇寶乃昇字也彼國王命名亦特取
生異以別于臣下耳姚文僖春秋大事表序經序云脩

純皇帝實錄時總理之人三易書成 上載命詞臣專
司書一竟以簡策繁多有不能覆定者皆如其舊余按
官書之誤尙至于此讀者不可不知又如近時中東之
役廷臣中請會議者有給事中謝希銓祭酒陸潤庠先
後兩疏皆留中未允而丹徒姚氏撰中東戰紀本末遽
以爲 朝旨命四品以上官會議則真郢書燕說矣
近時直隸總督裕祿奉天將軍慶裕等皆喜塔喇氏繼
昌行素軒雜記以爲他塔喇氏亦誤喜塔喇他塔喇原
以兄弟分支故不通婚姻然滿洲氏族固截然兩姓也
繼昌以旗人談旗事乃有此誤殊不可解

愧郗錄卷六云案國朝會要政和六年正月二十三日
詔近來京師姦猾狂妄之輩輒以箕筆聚眾立堂號曰
天尊大仙之名書字無取語言不經竊慮浸成邪慝可
令八廂使臣逐地分告示毀撤焚棄限三日外立賞錢
三千貫收捉犯人斷徒二年刺配千里官員勒停千里
編管若因別事彰露本地分使臣與犯人同罪每月一
次檢舉告示取使臣知委繳連聞奏宋時箕筆之禁其
嚴如此

周輝清波別志云政和四年詔置道階自六字先生至

鑒義

一作蒙

凡二十六等崇奉道教其權輿於此歟余按

元人稱道教曰先生蓋亦本此

永樂大典卷一萬九千九百二十七引仙愚錄魏主備法駕詣道壇受符籙旗幟盡青白後每帝卽位皆受籙蔡條鐵圍山叢談鐵圍山佛家多言之然皆與叢談之義不相關涉後閱永樂大典卷二千三百四十引元一統志云鐵圍山在興業縣南五里舊經云有四門東門砌石路通人行中有礧石上有二牛跡深三尺長二尺其中巖竇深邃泉流不涸南門山半有土基一闊四五丈俗傳古之敵樓西北二門多石山少林木陰闇如夜不通人行猿獐麋鹿來往其間據經所載卽古之鐵城

蔡條以坐父京累貶白州嘗遊息於此作鐵圍山叢談
然後知條之書名蓋出于此

聖祖仁皇帝庭訓格言曰我朝清字各國語音俱可以
叶 太宗皇帝時曾借蒙古字以代清文後來奉 敕

諭學士達海修飾蒙古字加以圈點而撰清文朕慮將
來或有授受之訛故特與高年人等校輯舊語製為清

文鑑頒行之既有此書則我朝清字必不至於遺漏矣

煙波釣叟歌句解

圖書集成藝術典第七百三卷

認取九宮為九星解

云天蓬貪狼主坎一宮屬水天內

按當即天芮

巨門主坤二

宮屬土天衝祿存主震三宮屬木天輔文曲主巽四宮

屬木天禽廉貞主五中宮屬土天心武曲主乾六宮屬
金天柱破軍主兌七宮屬金天任左輔主艮八宮屬土
天英右弼主離九宮屬火按此與臧龍經以廉貞屬火
貪狼屬木文曲屬水武曲屬土巨門屬金者無一相符
蓋術數家取星名爲記蒞之號非必有所占候也

庭訓格言曰子平六壬奇門等學其神煞名號盡是人
之所定凡術數家之取星名亦猶是矣

元尤玘萬柳溪邊舊話云始遷祖贈待制公

原注諱自叔保

晉江避難入吳嘗同王樞密康靖公游浮玉山宿壯繆
侯祠中以卜居求夢夜夢侯手賜錫器器中書一成字

覺告康靖康靖曰器者器皿也皿上著一成字錫者常
之西南有錫山神明賜公錫器意者俾公無錫而子孫
盛乎始祖遂領神意定居錫之許舍山中子孫世世奉
壯繆侯香火咳餘叢攷卷三十五云壯繆祠三國六朝唐宋
未有禮祀攷之史志宋徽宗始封關壯繆爲忠惠公大
觀二年加封武安王高宗建炎二年加壯繆武安王孝
宗淳熙十四年加英濟王祭於荆門當陽縣之廟元文
宗天歷元年加封顯靈威勇武安英濟王明洪武中復
侯原封萬歷二十二年因道士張通元之請進爵爲帝
廟曰英烈四十二年又敕封三界伏魔大帝神威遠鎮

天尊關聖帝君劉若愚燕史云太監林朝所請也繼又
崇爲武廟與孔廟並祀 本朝順治九年加封忠義神
武關聖大帝何寂寥於前而顯燦於後耶又云獨醒志
李若水爲元城尉有村民持一書來云夢金甲神人告
我到關大王廟側夷堅志明椿都統自立生祠於關王
廟側是宋時關王廟亦已多劉獻廷廣陽雜記云報國
寺乃關壯繆祠極其壯麗江陵舊城乃羽所築祠之宜
也而遂以江陵爲古荊州相去遠矣徐世溥榆溪詩鈔
自注粵賊所過琳宮梵刹悉燬獨關廟則畏懾遠避楚
中所存皆關廟也俞蔭甫茶香室四鈔云張唐英蜀檇

机永平二年贈張魯扶義公諸葛亮安國王天漢元年
正月封張飛靈應王按孟蜀加封諸葛亮張飛而不及
關公何耶

易林睽之无妄金城朔方外國多羊 仁皇帝庭訓格

言曰昔喀爾喀尙未內附之時惟烏朱穆秦之羊爲最
美厥後七旗之喀爾喀盡行歸順達里崗阿等處立爲
牧場其初貢之羊朕不敢食特遣典膳官虔供 陵寢

朕始食之按喀爾喀漢朔方舊地此足爲易林之確證

元柳貫護國寺碑摩訶曷刺神漢言大黑神也輟耕錄

云今上帝謂順初入戒壇見馬哈刺按卽摩訶曷佛前供

羊心上曰曾聞用人心肝者有諸帝師答曰有之凡人
萌歹心害人者事覺則以其心肝作供耳上曰此羊曾
害人乎帝師無答錢辛楣潛研堂詩集寶成寺觀元人
所鑿麻葛刺佛石像詩云何番僧作變相卻塑魔王喚
菩薩祝釐漫說朶兒禪梵語或訛馬吃刺纍纍髑髏懸
胷前吮血磨牙澹生活按大黑神卽釋典所謂大黑天
又楊瑀山居新話云元累朝於卽位之初須受佛戒九
次方登大寶而同受戒者或九人或七人譯語謂之暖
答世一日上入戒壇中見馬合哈刺佛前以羊心作供
上問沙刺班學士曰此是何物班曰此羊心也上曰曾

聞用人心肝爲供果有之乎班曰聞有此說未嘗目擊

問之刺馬可也

刺馬卽帝師余按卽今之喇嘛字

上命班叩之答曰有

凡人萌歹心害人者事覺則以其心肝作供耳遂以此言覆奏上曰人有歹心故以其心肝爲供羊何曾害人而以其心爲供耶竟無以答

永樂大典一萬三千一百三十一亦引此條此

所載較輟耕錄爲詳

晃西士加尼遠印度探地記云遊探所經民種各異其

風化之善者爲蒙古種

按此語誤余別有說

其色黃

又曰黃種

在遠印度閒者率皆略似其情性語言則隨地而異卽如安南柬埔寨南掌等部肌色較濃者亦關乎地土非天

成另外於黃種也故暹緬等部亦有微差至各部土番則種類迥異愚智不等或臣服遠印度或自主者大率皆在山麓間按其種類之易別者遠印度南地者與澳洲種同北土者與高加索同 又云遠印度南土居民與中國南界之土番悉皆黑種中國南界大山內之土番皆爲棕色種

遠印度土番之名有二類一隨各方土音如安南人名之曰麻衣柬埔寨人名之曰北囊南掌人名之曰解思中國人名之曰猓猓斯其實皆阿爾福羅種也一隨其分派而異其名支衍繁雜未能晰紀阿爾福羅種居澳

洲者甚多與澳洲各島土番不同其人身中面紫而清
尙未及黑較淡於印度等番腦後蓋上尖額低而展髮
際圓如環鬚純黑耳大而招耳柱粗雖不釘孔亦同面
平稍差於蒙古種面下削紋直而現鼻較印度種爲大
孔亦較展目深而平與蒙古反目骨高起眉睜近目而
彎顴無甚凸略如黃種筋現骨露口大脣厚腮骨直牙
牀大大牙左右各四與他種同惟澳洲種大牙偶有左
右各五者鬚微繆較蒙古種爲早出由上脣連兩腮身
上多毛聲厲醜其俗以口大者爲美女子亦略似身稍
圓乳微大丰貌靈性均遜黃種遠印度南地諸島土番

與此略同惟體較窄長四肢亦長而股尤甚身方筋隱
厚脾碩腹所食米少雜果居多日食倍常人始充腹化
液少下瀉多故體瘦而腹碩飲食致然也又云土番有
遷於澳洲者由遠印度駕獨木舟望澳洲直駛印度下
之嘛喇甲按卽麻六甲島并與澳洲接脈星布之各小島海
洋間隔竟能越流直抵澳洲之南緣遠印度土番庶衍
加以黃種迫處不得不遷也

黃林材西轡日記云麗江府古麼步詔爲六詔之一明
洪武時宣撫司副使阿得率眾歸附賜姓木授土知府
雍正元年改土歸流降爲土通判境內夷民凡有九種

曰麼步曰獬獬曰獬獬曰古獬曰西番曰巴苴曰刺毛

又有獬夷怒夷居於瀾滄江外

阿得本姓麥
見麗江志

漢書已程不國後世莫知其地按西人稱好望角爲炭
朴音頗相近豈漢人蹤跡已至南非耶姑錄此以俟攷
齊書張融傳今本多缺誤據永樂大典卷六千三百三
十九所引校之

茫沆汴

缺

大典作茫沆汴湔

律礪

大典礪作噉

礪礪

大典礪作礪

礪礪

大典礪下有礪字

罕浪碩培

大典培作拉

朋山相磬

大典朋作崩

王地交氛

大典王作玉

歲去

缺歸

大典作歲去陽歸

眇芬芳於遙渚

大典眇作盼

缺

軒帳席

大典作文軒帳席

長絃四斷

大典四作而誤

鯢渚

大典渚作水

星虛

大典虛作墟

禽麗色以拂煙

大典禽作山

求郡不得 大典不疊求郡二字

口終不言 大典口作白

食指 大典作食貨

眾瑞公事 大典瑞作端

況交音情 大典交作父

史臣曰金等其外 大典金作全其作塵

唐時袁州進士最多今據徐星伯登科記考錄之

李嘉祐

天寶七年唐才子傳趙州人極元集袁州人又李端嘉祐姪大厯五年進士

彭伉

貞元七年

湛賁

貞元十二年

宋迪

貞元十三年

錢識

元和五年

賈馨

元和七年

今本宜春志云通志作賈馨誤

易之武

寶歷元年

袁州府志一作萍鄉人

鄭史

開成元年

楊鴻

開成二年

謝防

會昌元年

宋震

會昌二年 永樂大典引袁州府圖志云宋震齊邱之祖登會昌二年進士第

盧璧

會昌三年狀元

黃頤

會昌三年第三人

李潛

會昌三年登科記考引據言潛字德隱不云何許人據宜春縣志有潛傳故補入

易重

會昌五年狀元

魯受

會昌五年

徐渙

大中十年

伊璠

咸通四年唐詩紀事作伊璠新修宜春志誤作尹璠

袁皓

咸通四年

盧文秀

咸通六年登科記考未載據宜春縣志補入文秀肇之子也

曾繇

咸通十二年

鄭谷

乾符三年史之子永樂大典引宜春志作光啟三年誤

何迎

廣明元年

曾德邁 光啟三年 袁州府志有之登科記未載

蔣肱 大順二年 永樂大典引宜春志作大順三年誤

易標 景福二年

盧邈 景福二年 宜春縣志有之登科記未載登第年
分永樂大典引宜春志云邈唐末寄舉湖南登第
獻周文詩二百首

唐廩 乾甯元年 永樂大典引宜春志乾甯元年唐廩
登進士第新唐書藝文志廩萍鄉人

陳炯 乾甯四年

何幼孫 乾甯四年 陳炯何幼孫二人登科記均據永
樂大典作乾甯五年

王穀 登科記據唐才子傳穀乾甯五年羊紹素榜進士
袁州府志作天祐二年新志作後漢乾祐二年誤

李旭 天復四年 宜春志作天祐二年

徐瓊 歐陽薰 伍唐珪 李甲 張爲 謝辟 陳

嶸 吳罕 黃諷 劉望 李滄 彭遵 袁希古

劉廓 朱鵬舉 周確 梁珪 張咸 許洞 蔣勳

趙防 崔絳 劉仁祥 李餘慶 易廷楨 彭惟

岳以上二十六人登科記考云並見永樂大典引宜春志袁州府志引宋嘉定志亦有之

袁州府志尙有李令晏天祐二年進士又南唐昇元間進士有李徵古徐錯府志入萬載人後漢乾祐元年進士第一劉式府志作萍鄉人

太平寰宇記卷五十五引顏脩內傳記橋順子橋璋橋琮學仙事引魏文帝詩曰西山有雙童不飲亦不食謂

此也顏脩內傳侯君模補三國藝文志失載又卷五十六引魏地記云滏口山卽魏帝邀擊袁尙于此云云魏地記侯氏亦失載

倪二初讀書記五詩云惠此中國中國對諸夏言之謂京師也孟子北學於中國中國對南蠻言之謂諸夏也同言中國而所指不同經典中類此者多矣

宋曾三異因話錄云近歲衣制有一種如旋襖長不過腰兩袖僅掩肘名曰貉袖聞起於御馬院短前後襟者坐鞍上不妨脫著短袖以其便於控馭耳今士大夫亦服之余按今世所行馬褂殆與此類汪芙生松煙小錄

云揣曾氏說與今日行袿正相似

會典行袿長與坐齊袖長及肘用石青色

姚文僖邃雅堂集宋諸儒論云大氏君臣之禍甚於六朝夫婦之義紊於唐代至五季之亂倫紀全缺刈人民如羊豕由是不反乾坤將息宋諸儒出然復孔孟之道復明大凡更事深則防患亟湯武之事孟子不非然後世託於湯武者則不得不嚴絕之齊莊之亂晏子以爲非其親暱衛孔慄之難子羔以爲弗及不與蘧伯玉兩出近關似苟全軀命不恤其君者乃夫子稱曰君子三代以上婦人不諱再適故爲出母有服至宋儒守從一之經嚴失節之律今雖委巷婦豎皆羞更嫁矣古之論

人寬今之論人刻何者時會日降事變愈滋苟非峻立其防則必有寡廉鮮恥浮沈取容恬不知非者此諸儒慮患之心不得不如是其切也余謂契敷五教其道在寬至宋儒而盡繩以嚴峻之法幾於司空城旦書矣近人多以是病宋儒要非無故然坊記一篇每苦峻爲之防猶致崩弛則凌夷之後激爲峭直固有由然文僖此論亦可謂心知其故矣

吳振臣甯古塔記略云滿洲人家歌舞名曰莽式有男莽式女莽式兩人相對而舞旁人拍手而歌每人於新歲或喜慶之時上於太廟中用男莽式禮按此卽喜起

舞也女葬式禮未聞記略又云凡大小人家門前立木一根以此爲神按今時都中滿洲人家祠中皆有之俗稱曰媽媽竿竿繫一繩以族中人名字生年書繫繩上此記略所未及者也

約章分類輯要傳教門文廟捐款民教一律通派條云孔子爲中國至聖歷代崇敬教民雖習外國之教實係中國之人若祇知有天主而不知有孔聖則與叛民何異人心所不順卽王法所不容天主教卽不應收留此等匪人入教此同治十二年鉅鹿縣案由北洋大臣函致法蘭西熱使之詞而熱使轉飭領事及教士皆無可

致辭者也余案天主教例凡入教者皆先有不背本國之誓孔子爲中國國教天子所尊則凡入教之人不

能違異必矣此函義正詞直故彼國使臣教士均俯首

無辭也

此函又云從前髮捻各逆到處焚燬廟宇而於文廟則特加敬重未敢焚燬一處

書堯典克明俊德史記作能明馴德余案馴卽順字順

德孝弟之德也孝經先王有至德要道以順天下卽能

明馴德之義爾雅順父母爲孝順兄弟爲友漢書平當

傳元帝時韋玄成爲丞相奏罷太上皇腹園當上書曰

昔者帝堯南面而治先克明俊德以親九族而化及萬

國孝經曰天地之性人爲貴人之行莫大於孝孝莫大

於嚴父嚴父莫大於配天則周公其人也夫孝子善述
人之志周公既成文武之業而制作禮樂修嚴父配天
之事知文王不欲以子臨父故推而序之上極於后稷
而以配天此聖人之德亡以加於孝也上納其言詔復
太上皇寢廟闕此疏稱聖人之孝而引帝堯克明俊德
知以俊德爲孝德實今文尙書歐陽家義

儒林

傳

平當習歐陽
尙書見漢書

日本熊本縣有游泳術其學分三段初曰踏水術次曰
吞水術末曰忘水術踏水者弄潮泅水之淺技至吞水
則如雨軍相當氣吞勁敵雖洪波大瀾亦陵蹶之然猶

有水之見存也忘水術則列子所記呂梁之夫與齊俱入與沒俱出者相類蓋淡然不知其爲水雖處溟淵如在陸矣學此者必先習禪定久久而後有效今猶閒有能之者故熊本一縣中大半皆通釋理山習此異術者多也

中國五行之說專重目驗而切人用故不言風而言木不言地而言土古之天文家亦然日食可推而得而言日有食之月亦出東方而言月生於西是也鄒特夫終日七襄解學計一卷上得云以恆星赤道經緯求之是時織女在赤道北三十八度其出地至入地常越七時則更七

次計織女每日在地平上所行也古之爲文詞者於星日以出地爲行入地爲止不必繩以實象故淮南子言日於旦曰爰始將行於昏曰爰止其馬不數地下之行者所謂知其不可知也特夫之言深合經意

紀文達四庫提要原稿有故事類其序云故事有二祖宗創法奕葉慎守是爲一朝之故事後鑒前師與時損益是爲前代之故事史家著錄大抵前代事也隋志所載攬以漢武故事西京雜記濫及稗官八王故事今雖未見其書據世說新語注所引直傳記耳唐志載魏文貞故事之類宋志載尉遲偓中朝故事之類均循名誤

採不核本書更如樹萱錄之入種植矣今總核遺文惟以國政朝章六官所職者入於斯類以符周官政府之遺至儀注條格舊皆別出然均爲成憲義可同歸政典禮經古原一理後世失其本意歧爲多途非先王制作之意也又元典章前集六十卷附新集原本著錄今改入存目

純常子枝語卷三十三

萍鄉文廷式撰

包孝肅請兩制官祀九宮貴神

奏議卷二

云伏睹唐天寶年

勅以九宮神實司水旱功佐上帝德庇下民又准禮九
宮次昊天上帝壇在太廟之上用牲牢璧帛類天地神
祇余案九宮之神卽太一下行之九宮以太一爲上帝
故九宮之神曰佐上帝也蕭吉五行大義五云太神太
一主風雨水旱兵革飢疫災害復使十六神遊於九宮
又云天一是含養萬物太一是察災殃是爲天帝之臣
按蕭氏不知太一卽上帝失周漢人之舊義矣

水經沔水篇注瀼水又南逕張魯治東水西山上有張天師堂于今民事之按張天師號始此

太上正一朝天百拜寶懺稱天師夫人姓雍氏歲時廣記三十六引女仙錄孫夫人三天法師張道陵妻也以桓帝永壽二年九月與天師於閩中雲臺山白日昇天正一天師傳張留孫者字師漢信州貴溪人少時入龍虎山爲道士有道人相之曰神仙宰相也

圖書集成藝術典六百十

馬禮遜外國史略云蕪來由之列地由暹羅而南斜行到六坤宋

蓋六鯢身之轉音

腳此地之民半暹羅語音喜拜佛

像半燕來由各類并回回人拜天地眞主暹羅官之在此者每酷虐燕族余謂暹人與蕪人種族相同其酷虐之者蓋同種而不同教之故邵大緯薄海番域錄曰婆羅一名文萊俗素食念佛禁食豬肉犯者論死文萊卽燕萊由之異譯禁食豬肉者回教例也邵氏誤矣王之春使俄草云婆羅洲今稱般島南屬荷北屬英

後漢書張衡傳上疏曰臣聞聖人重之以卜筮維之以九宮注易乾鑿度曰太一取其數以行九宮鄭玄注云太一者北辰神明也下行八卦之宮每四乃還於中央中央者北神之所居故謂之九宮天數大分以陽出以

陰入陽起於子陰起於午是以太一下行九宮從坎宮
始自此而從於坤宮自此而從於震宮自此而從於巽
宮所以行半矣還息於中央之宮既又自此而從於乾
宮又自此而從於兌宮又自此而從於艮宮又自此而
從於離宮行則周矣上游息於太一之星而反紫宮行
起從坎宮始終於離宮也

五經通義曰天神之大者曰昊天上帝卽耀魄寶也亦
曰天皇帝亦曰太一其佐曰五帝東方青帝靈威仰
南方赤帝赤熛怒西方白帝白招矩北方黑帝汁光紀

中央黃帝含樞紐

古今事類
全書一

楚詞九歌東皇太一篇云穆將愉兮上皇王逸注曰上皇謂東皇太一也宋玉高唐賦曰醮諸神禮太一案上皇卽上帝之稱變言上皇者以協韻之故以此知中國古昔以太一爲上帝矣文選西都賦注引春秋合誠圖曰紫宮大帝室太一之精也又引春秋元命苞曰紫之言此也宮之言中也言天神圖法陰陽開閉皆在此中也太乙人道命法君基總論云君基太乙爲紫微大帝羣曜之尊執掌權衡較量天地卽沿合誠圖之說說文一字訓云造分天地化成萬物亦以太一爲造化主故有此語然則三古以前言天之理中外同也馬驢繹史

卷五引泰壹雜子云黃帝謁峨眉山見天真皇人拜之玉堂

曰敢問何爲三一之道皇人曰而既已君統矣又咨三一
一無乃朗抗乎泰壹雜子漢書藝文志入之神仙家泰
壹卽太一故後世以太一爲上帝惟道家尙存其說又
由太一而言三一則道家所謂一氣三清者而景教三
一妙身之言亦沿於此矣

老子一生二二
生三亦卽此義

賈公彥周禮大宗伯正義引文耀鉤云中宮大帝其北
極星下一明者爲太一之先合元氣以斗布常

史記封禪書宜立太一而上親郊之天官書中宮天極
星其一明者太一常居也正義曰泰一天帝之別名也

索隱引春秋合誠圖云紫微大帝室太一之精也周禮

注昊天上帝又名太一

隋志曰北極大星太一座也

宋制明堂神位

殿上有昊天上帝位東廊又有天乙太乙位

見文獻通攷卷十二

史記封禪書謬忌奏祠太一方曰天神貴者太一索隱

樂汁徵圖曰天宮紫微北極天一太一宋均曰天一太

一北極神之別名春秋佐助期曰紫宮天皇曜魄寶之

所理也石氏云天一太一各一星在紫宮門外立承事

天皇大帝此於太一天一外別尊天皇大帝實宋制之

所本顧亭林曰太一之名不知始於何時

日知錄卷十

余謂

太者卽惟初太始之謂一者卽數立於一之謂許氏訓

其義矣禮記所稱禮本太一卽禮本於天之謂此等強名不必推原事始也

易乾鑿度曰太一取其數以行九宮九宮者一爲天蓬以制冀州之野按楚辭雲中君篇覽冀州兮有餘蓋用斯義太一行九宮法始於坎宮故云冀州自此而徙於坤宮於震宮於巽宮而息於中央又徙於乾宮於兌宮於艮宮又於離宮行則周矣而上息於太一此所謂橫四海兮焉窮也太一行九宮法必始於周末也

所姓光緒癸巳順天副榜貢生所開先掖縣人案史記司馬相如傳有所忠正義引風俗通姓氏云漢書有諫

大夫所忠氏

光緒丙戌春季摺紳有炳姓湖北荊州人炳遂爲清泉縣新城司巡檢有廬姓四川漢川人廬汝湘爲永興縣典史有信姓金縣訓導信中選平涼人

光緒庚子夏季摺紳有分發奉天知縣鮮俊英順天人鮮姓蓋鮮于複姓所改也

廣東連平州有鄉姓

湖北監利有革姓自言明臣黃子澄之後見譚獻復堂日記

陳雲鄺齋雜記云余所見奇姓線

浙江巡撫鎖把粘薩皆福建舉

人脫香部

湖北 勾門

江南

川楚報捐錄有銀渠二姓粵

東有禡姓老姓布姓雞姓獻贖有遣犯糟二但明倫係
貴州甲榜出科聯係乾隆戊午福建解元皆可補漢洋
居易錄之缺余按粘薩脫皆出自蒙古勾姓當出勾龍
渠但未爲希姓獻贖所載犯人名姓率意繕寫非必出
自本然未足爲據也出科聯後登進士科見太學題名
碑記但姓據漢書注音單今皆讀去聲

止園筆談五昌黎縣有朴姓讀爲瓢乃高麗姓案集韻
朴一作搜求切音颯夷姓魏志建安二十年巴夷王朴
胡舉巴夷來附古蕭尤二韻通又六合有朴姓見周櫟

園書影

黃山谷集有次韻答和甫廬泉水詩注云初虞世字和甫工醫居東平府須城縣廬泉鄉老學庵筆記云初虞世以醫名天下元符中皇子鄧王生月餘得痢疾危甚羣醫束手虞世獨以爲必無可慮不三日王薨信乎醫之難也

水經河水篇注曰魏襄王十七年邯鄲命吏大夫奴遷於九原又命將軍大夫適子戊吏皆貉服全謝山云貉服卽胡服也案此則不獨趙武靈胡服騎射魏襄亦嘗改軍吏胡服矣胡服便戰鬪自古然也

水經河水篇注曰地理志言高奴縣有洧水肥可糲

趙

清曰俗本漢書落肥字

水上有肥可接取用之博物志稱酒泉延

壽縣南山出泉水大如筍注地爲溝水有肥如肉汁取

著器中始黃後黑如凝膏然極明

案然下疑脫之字

與膏無異

膏車及水碓缸甚佳彼方人謂之石漆水肥亦所在有

之非止高奴縣洧水也按此卽今日煤油之類明謝肇

淞五雜俎

卷四

云蜀有火井其泉如油熱之則然

宋吳斗南兩漢刊誤補遺

四

曰惟泰元尊媼神蕃釐師

古曰泰元天也媼神地也仁傑曰泰元者泰一也泰一

與天地並而非天也志載天一祠三一天一地一泰一

又載其贊饗曰天增授皇帝泰元神筭皇帝敬拜泰一
又爲泰一縫旗命曰靈旗故此章有泰元及靈旗之文
媼字當作媼媼神者鬱煙以祀神東京賦所謂致高煙
乎泰一是已禮祭天以煙爲歆神始祀泰一同於祀天
故燎熏皇天皋搖泰一揚子雲以爲並稱云余謂三一
卽太極兩儀故泰一卽太極天一地一卽兩儀無論萬
國之祭祀皆以三神一陰一陽一兼理陰陽爲始固人心之所同
然也一或作元易理也易之乾元卽天一易之坤元卽
地一矣

文選陸倕新刻漏銘注引崔玄山瀨鄉記曰老子母碑

老子把持仙籙玉簡金字編以白銀紀善掇惡按此宋人太上感應篇之所託始也

禮記祭法鄭注云小神居人之閒司察小過作譴告者是感應篇記過之說固亦出於漢儒特借太上立說乃入於道家耳林伯桐供翼小言鬼神篇云詩曰相在爾室尙不愧於屋漏此經之微言非蚩蚩者所知也

宋芸子采風記云歐洲有巴柳士良教散處各國子身修鍊西人書言古時多隱者伏處山洞清修不與世事而不能考其由來

林文忠華事夷言云中國有同回之馬夥墨頓教各處

建廟禮拜又有由教其人甚少只散在鄉間單身修煉
采風記云回教則分由斯原注亦曰由教卽西域婆羅門舊教馬哈墨比
阿釐三種余案中國有猶太教而由斯則未之聞豈回
教之旁支無從晰其歧別耶

新譯萬國通史阿喇伯志云慕罕默德又自稱彌賽亞
降世冀羅致旅居貊隄那之猶太人此又譯摩西爲彌
賽亞然可知猶太奉摩西卽以摩西爲教名景教旣稱
彌施訶教則爲猶太教無疑也

水經漾水篇注引續漢書曰虞詡爲武都太守下辨東
三十餘里有峽峽中白水生大石障塞水流春夏輒潰

湓敗壞城郭詔使燒石以醢

趙一清曰御覽引作醢

新之新唐書

地理志云嚴礪自長舉縣西疏嘉陵江二百里焚巨石

沃醢以灌之案此卽近世用炸藥轟石之嚆矢也

元史元初施用文字用漢楷及畏吾

元典章作衛兀

字世祖中

統元年命國師八思巴製蒙古新字字僅千餘其母凡

四十有一其開關紐而成字者則有語韻之法大要以

諧聲爲宗二十一年勅中書省奏目及文冊皆不許用

畏吾字其宣命劄付並用蒙古書趙頤石墨鐫華云蒙

古字法皆梵天迦盧

按卽佳盧

之變也故與佛眞言相類重

陽萬壽宮元碑皆以蒙古字書余按蒙古文與山西吉

文不相類特其字母之法據梵字爲增減耳

趙甌北廿二史劄記

卷三

云元諸帝多不習漢文大臣

亦多用蒙古勳舊罕有留意儒學者世祖時尙書留夢炎等奏江淮行省無一人通文墨者乃以崔或爲江淮行省左丞李元禮諫太后不當幸五臺帝大怒令丞相完澤不忽木等鞠問不忽木以國語譯而讀之完澤曰吾意亦如此是不惟帝王不習漢文卽諸大臣中習漢文者亦少也余案元時蒙古人不堪習漢文而漢人頗有通蒙古文者今之蒙文字母百餘已非元舊而見於陳元靚陶宗儀書者猶可見其仿佛亦足歎興廢之

不常爾

元史世祖紀至元九年和禮霍孫奏蒙古字設國子學而漢官子弟未有學者及官府文移猶用畏吾字詔自今凡詔令皆用蒙古字仍遣百官子弟入學至二十九年河南福建省臣奏請詔書用漢字帝命以蒙古語詔河南漢語詔福建順帝本紀至元中禁漢人南人勿學蒙古畏吾字書

宋張南軒曰南海諸番書煞有好者字畫遒勁如古鍾鼎款識諸國各不同風氣初開時此等事到處皆有開其先者不獨中國也

南軒文集

南軒不以諸番書爲出自中

國是其識見高廣處

邵大緯薄海番域錄曰婆羅一名文萊余按廣東人呼

南洋人曰摩羅

清平聲

亦文萊之轉音又云婆羅有東

西二王永樂四年各遣使來朝相傳國王閩人隨鄭和
往因留鎮焉王府旁有漢字碑

唐李嘉祐夜聞江南人家賽神因題其事詩云南方淫

祀古風俗楚姬解唱迎神曲鎗鎗銅鼓蘆葉深寂寂瓊

筵江水綠又云韓康靈藥不復求扁鵲醫方曾莫睹

見唐

風集此與薩瑪教大略相似薩瑪教即中國之巫教也

西清黑龍江外紀達呼爾

即達瑚哩

病必曰祖宗見怪召薩

瑪跳神禳之薩瑪巫覡也其跳神法薩瑪擊太平鼓作歌病者親族和之歌詞不甚了了尾聲似曰耶格耶薩瑪曰祖宗要馬則殺馬以祭要牛則椎牛驪黃牝牡一如其命有所殺無算病者死而家亦破者然續有人病無牛馬猶宰山羊以祭不敢違薩瑪之命伊徹滿洲伊徹也病亦請薩瑪跳神而請扎林一人爲之相扎林唱神歌者也祭以羊鯉用腥薩瑪降神亦擊鼓神來則薩瑪無人色如老虎神來猙獰媽媽神來喫咻姑娘神來覷覷各因所憑而肖之然後扎林跪陳祈神救命意薩瑪則啜羊血嚼鯉執刀槍叉挺卽病者腹上指畫而默誦

之病亦小愈然不能必其不死按各書所記薩瑪惟祭神禳病餘無所爲實沿古昔巫風而未可謂之立教也外紀又記達呼爾富林嘗言跳神一事不見經傳旣知其非而因循不改用夏變夷之謂何則達呼爾人亦有服習儒術者矣

徐宗亮黑龍江述云云巫風盛行病者輒招巫入室裝束如方相狀以鼓隨之應聲跳舞云病由某祟飛鏡驅之向病身按摩數次遂愈或延喇嘛治之亦大同小異寺觀無僧道行腳者亦尠唯呼蘭三城時一遇焉陳玉璫寧古臺方言記

學文堂文集卷七

云跳神之家主婦主壺而

男子擊鼓佐之無親疏男女環觀祭畢雜坐分糕如受

餒餽邀鄰里若重貺然

饒名飛石黑阿峰猶漢言黏穀米糕也

吳其禎緬甸圖說云緬甸語言文字風俗與印度同黃
楸林西輶日記云其字體望之如連圈不斷有二十六
字母

祁鶴皋回俗紀聞

見新疆要略卷四

云回字凡二十九字頭或

兼數音而成一字或聯數字而成一音明一統志卷九
十云回回書體旁行有篆草楷今西洋諸國皆用之

明李詡戒庵漫筆卷三云韃人稱中朝皇帝爲罕蓋胡

人聲重而疾古云可

音汗克

音寒音近罕耳又云達達稱中

國官府爲阿法

黃省曾西洋朝貢典錄榜葛刺國東印度之國也其語
謂之榜葛俚亦善吧兒語

案今譯作巴利

樂工謂之根肖速魯

奈

近人馮知遂有馬拉語類記巫來由語言

見潘飛聲說劍堂集余

未之見

祁鶴皋新疆要略卷四厄魯特舊俗紀聞云其文字謂
之托忒共十五字頭每字頭凡七音共得一百五音其
法直下右行用木筆書之或削竹爲筆長四寸上闕而
下銳取墨以作書謂之烏珠克龔定菴集蒙古字類表

云蒙古文字又爲準部託忒之祖託忒十五頭皆略仿蒙古無圈點而末筆直下波磔方闊者也

江西南昌有澹臺門門內有澹臺墓成豐間有欲發其墓者甫穴其前則萬蛇蠭蟻中植一劍因懼而止友人黃豪伯知縣楸材爲余言之以爲靈異也余按水經潛水篇注引陳留風俗傳曰陳留縣裴氏鄉有澹臺子羽冢又有子羽祠民祈禱焉京相璠曰今泰山南武城縣有澹臺子羽冢縣人也未知孰是夫陳留風俗之所記春秋土地之所傳滅明所藏居然有二而大江南服更有遺墟旣斬長蛟爰安委蛻亦其所矣聖賢名蹟附會

良多尙父釣臺子夏石室猶斯類也誌方輿者慎無自
矜攷覈妄刪舊聞斯爲得耳

雜兵書曰八陣一曰方陣二曰圓陣三曰牡陣四曰牝

陣五曰衝陣六曰輪陣七曰浮沮陣八曰雁行陣

文選陳孔

璋爲曹洪與
魏文書注

余案握機經之八陳所謂天地風雲龍虎

鳥蛇者實同於此方圓卽天地牡牝卽龍虎

道家多用此

卽風輪卽雲浮沮卽蛇雁行卽鳥也古兵家陣法大抵

如此異其名不異其實也汪宗沂輯諸葛武侯八陣兵

法以雜兵書之言爲是而力闢龍虎風雲之非可謂知

二五而不知一十者也

趙雲嵇廿二史劄記論金末種人被害之慘云一代敝
政有不盡載於正史而散見他書者金制以種人設猛
安謀克分領之使散處中原世宗慮種人爲民害乃令
猛安謀克自爲保聚其土地與民犬牙相入者互易之
使種人與漢民各有界址意至深遠也其後蒙古兵起
種人往戰輒敗永安中主兵者謂種人所給田少不足
參身家故無鬪志請括民田之冒稅者給之於是武夫
悍卒倚國威以爲重有耕之數世者亦以冒占奪之及
宣宗貞祐閒南渡盜賊羣起向之恃勢奪田者人視之
爲血讐骨怨一顧盼之頃皆死於鋒鏑之下雖赤子亦

不免事見元遺山所作張萬公碑文又完顏懷德碑亦云民間讎撥地之怨睚眦種人期必殺而後已尋蹤捕影不三二日屠戮淨盡甚至掘墳墓棄骸骨惟懷德令臨淄有惠政民不忍殺得全其生可見種人之安插河北諸郡者盡殲於貞祐時蓋由種人與平民雜處初則種人倚勢虐平民後則平民報怨殺種人此亦一代得失之林也然金史不載此事僅於張萬公傳中略見之余按山東直隸各州縣如完顏徒單等姓尙偶見之是當時屠戮有未盡者特亦僅存什一於千百耳本朝駐防之制與金時安插種人稍異然洪楊之亂江甯浙江

兩處駐防幾於靡有孑遺亦以平日凌虐平民積忿之所致也孰能使其相忘於江湖哉

陳玉璫寧古臺方言記云諸申木克猶漢言滿洲水也滿洲舊稱諸申呼水爲木克法取蔬作釐置木桶中和鹽少許以水溢之其汁微酸取以代醢按諸申滿洲源流攷作珠申以爲肅慎之轉音吳振臣甯古塔記略云水曰目克

甯古塔記略記土語如父曰阿馬母曰葛娘

余按葛金當作遐

曰愛星

按卽愛新

銀曰蒙吾

按卽蒙兀

書曰必帖黑之類頗有與

蒙古語相同者此由滿洲蒙古婚姻互通故言語相雜

也如硯曰硯注錢曰濟哈

按濟哈二字急呼則成錢音

木曰木立衣

曰衣立之類則又似漢音當由柳邊之外商賈久通故
言語亦有時出入矣後漢書辰韓其名國爲邦弓爲弧
賊爲寇行酒爲行觴蓋種類既同斯名稱相襲又其宜
也

姜宸英湛園札記曰唐書摩揭它國傳太宗遣使取熬
糖法詔揚州取蔗柞瀋如其劑色味愈西域遠甚此則
中國用糖之始以諸蔗爲糖其法始於佛氏然吳志孫
休傳已有甘蔗餚矣余按楚辭招魂篇云濡鼈炮羔有
柘漿王逸注云柘諸蔗也取諸蔗之汁以爲漿飲也取

蔗瀋爲飲自古有之特製爲糖霜則其法至唐始得之
西域耳漢書郊祀志泰尊柘漿析朝醒案葉廷珪海錄
碎事卷六南蠻赤土國以甘蔗作酒雜以紫瓜根酒色
黃赤然則古所謂柘漿者或以甘蔗爲酒亦未可知
文選班固堅封燕然山銘躡冒頓之區落區落李崇賢
無注余謂區落蓋卽單于帳殿之稱區讀如歐元人窩
耳朵幹耳朵皆區落之音轉日本人稱拔都大王所建
庭曰金黨酒卷鷗公有金黨史沈子培刑部云金黨卽
幹耳朵之對音案那珂通世敘云編述金幹耳朵之史
則幹耳朵三字急呼爲黨如沈君說

晉崔豹古今注曰薤露蒿里並喪歌出田橫門人橫自殺門人傷之爲之悲歌言人命如薤上之露易晞滅亦謂人死魂精歸乎蒿里故有二章其一曰薤上朝露何易晞露晞明朝更復落人死一去何時歸按今本第一句無朝字此用文選陸士衡挽歌行注其二章曰蒿里誰家地聚斂魂魄無賢愚鬼伯一何相催促人命不得少踟躕至李延年乃分二章爲二曲余按琴操所載歌曲或由後人追摹其聲所作此二章旣爲李延年所用則實出於西漢之初兩章皆七言古詩第一章尤純用七言故論文章緣起者七言詩當以此爲始非如高帝大風歌猶用楚辭之舊調

也

宋日本僧道元實慶記道元問首楞嚴經圓覺經在家男女讀之以爲西來祖道元推尋兩經文之起盡不同大乘諸經有劣於諸經之言句無勝於諸經之義勢頗有同六師等之見畢竟如何法定天童淨云楞嚴經自昔有疑者也謂此經後人搆歟先代祖師未曾見也近代癡暗之輩讀之愛之圓覺經亦然文相起盡頗似也余嘗攷至元法寶勘同錄及沈氏西清筆記知楞嚴經實竺土所無而圓覺則傳自西方未有異義今乃知宋時並有疑之者故錄存其說以質後人

水經滢水注曰皇女湯道士清身沐浴一日三飲四十
日後身中萬病愈三蟲死按三蟲卽三尸唐窺基法苑
義林章卷二云阿難迦葉執麾三屍繫咽第一人屍第
二狗屍第三蛇屍按此出大智度論此釋氏言與道家三彭無
涉羅昭諫集有寄第五尊師詩云朱黃揀日囚尸鬼青
白臨時注腦神尸鬼謂三尸也真人制魂魄說云三尸
上尸青姑中尸白姑下尸血姑三尸蟲一彭据二彭盾
三彭矯真俗佛事編云三尸蟲如三猿形此道教之法
日本法於庚申本尊之前塞目塞口塞耳以爲杜三猿
之居兒島碩鳳佛教字典以爲好事者取孔子三緘故

事以不言不問不見垂教云避暑錄話載唐末道士程紫霄詩云不守庚申亦不疑此心常與道相依玉皇已自行行止任汝三彭說是非

明人論詩每有佳語而駁正古人則往往多謬王敬美

藝圃擷餘云文選李善注有牽合古書而不究章旨如

曹顏范思友人詩清陽按選原作清揚敬美改作陽未按宋本作永敬美所見乃

謂本可候善引詩以爲清揚婉兮人之眉目間也然於章

法句法通未體貼其詩本言霖潦玄陰與歐陽子別句

朔而思之甚故曰褰裳以應潦也清陽未可候猶曰河

清難俟耳蓋以清陽反霖潦玄陰也其意自指日出或

卽青陽而誤加三點如上褰裳誤作寒裳

按舊本不誤

耳何

必泥毛詩清揚令句不可解耶余謂此敬美之誤崇賢不誤也曹詩自心與迴飆俱以上皆言景思心何所懷以下皆言情此二句云褰裳不足難清揚永可俟蓋言雖霖潦尙可褰裳何必望晴霽如河清難俟乎褰裳清揚皆用詩經是古人精切處且下文云延首出階檐佇立增想似正爲想見其眉目耳若青陽難俟則何必延首階檐以受漸瀝哉如敬美所論章法句法眞乃隔閡而牽議古人後生所當誠也

彭孫貽客舍偶聞云金史蒙古在女眞北勁勇善鬪在

古爲蒙兀部衣鮫魚皮禦弓矢然則蒙古本東人卽今
魚皮縫子乃蒙古種旣而走沙漠爲蒙古以別之與東
人爲二矣余按蔡伯喈伐鮮卑議云鮮卑種衆新盛自
匈奴北遁以來據其故地稱兵十萬彌地千里意智日
生才力勁健兵利馬疾過于匈奴是東人之走漠北自
古已然蒙古特襲鮮卑之舊迹耳

爾雅歲陽歲名西人旣云與猶太合然中國古籍用之
者惟呂氏春秋序意篇惟秦八年歲在潛灘秋甲子朔
一條張獻山舒藝室隨筆云古書用歲名者僅見此若
楚詞之攝提貞于孟陬自謂月建

史記天官書大角書
天王帝廷其兩旁各

有三星鼎足句之曰攝提攝提者直斗柄所指以建時節故曰攝提格

王叔師誤以太歲

釋之余謂爾雅爲釋經作必在周秦之際秦人好勤遠略又僻在西戎其所交通當逾天竺劉向列仙一傳未必盡誣羅馬建號旣云大秦而巴比歲名遂傳中土無可疑者春秋各國惟用十二次之名而呂氏好奇獨標異語亦所以示博於國人故雖有懸金莫敢易其一字矣

宋費衮梁谿漫志

卷三

云今之稱複姓者皆從省文如司

馬則曰馬諸葛則曰葛歐陽則曰歐夏侯則曰侯鮮于則曰于如此之類甚多相承不已複姓將混于單姓矣

唐永貞元年十二月溘于姓改爲于以音與憲宗名同也至今二于無復可辨如豆盧蓋唐大族欽望瑑革皆嘗爲相而此姓今不復見其殆混于盧邪余按至明初複姓改爲單姓而氏族之混者益多矣補之之言可謂先識也

明李詡戒庵漫筆卷七云今人家買得贗譜便詫曰我亦華胄也最是可笑此事起於袁鉉鉉以積學多藏書貧不能自養業此以驚愚賈利耳按此近世家譜所以多不足信也

明謝肇淛五雜俎

卷十

云陶穀原姓唐因避石晉諱而

改眞德秀原姓慎因避孝宗諱而改夫以君父一時之諱而更祖宗百代之氏不孝孰甚矣爾不足責也西山大儒乃爲此耶至萬季野之詆魏了翁了翁本姓高尤不可解矣

李遜之崇禎朝記事

卷四

云御史楊若橋舉西洋人湯若

望製火礮禦敵左都御史劉宗周奏國之大事以仁義爲本若望向來創說邪教堂堂中國若用其小技以禦敵豈不貽笑上曰火器是中國長技若望比不得外夷宗周奏若望小技何益成敗目今要慎選督撫若文官不要錢武官不怕死何愁不太平戴山正人而持論乃

如此兵者專門之學儒家不宜妄議也明史外國意大里亞傳其國善製礮視西洋更巨既傳入內地華人多效之而不能用天啟崇禎閒東北用兵數召澳中入入都令將士學習其人亦爲盡力

魏叔子史論曰成祖三犁庭可謂武矣建都北平天子守邊可謂壯矣而乃棄三衛以資虜斷三邊之喉虛京師之背若庸主所爲何哉蓋其初急於得天下其後喜於得天下急則慮疏喜則志盈既疏且盈神智不守昧於遠圖無足怪已余嘗謂明人棄越南棄河套皆謀國之不臧而莫謬於棄三衛遂循至於亡國以此觀之

成祖固無經國之遠猶也

邵長蘅青門麓藁梁維本墓表云順治間公抗疏略曰
伏願 皇上親禮儒臣留神經史之學讀漢書習漢字
奏章不藉翻譯大臣面陳幾務天下幸甚況 皇上說
學則滿洲蒙古大臣莫不說學其裨益尤大 上嘉納
之

維本爲大學
士其標之父

宋高勝仲丹陽集乞以學書上御府并藏辟雍劄子云
以大觀三年歲終數編纂今已成書總天下二十四路
教授大小學生以人計之凡一十六萬七千六百二十
二學舍以楹計之凡九萬五千二百九十八學錢以緡

計之歲所入凡三百五萬八千八百七十二所用凡二百六十七萬八千七百八十七學糧以斛計之歲所入凡六十四萬二百九十一所用凡三十三萬七千九百四十四學田以頃計之凡一十萬五千九百九十房廊以楹計之凡一十五萬五千四百五十四既以逐州縣離爲析數又以天下合爲總數凡二十有五冊而中都兩縣之數不與焉

宋葛剛正三續千字文注云國朝廷試唱名第一第二甲敕賜進士及第第三甲第四甲敕賜進士出身第五甲敕賜同進士出身有明以來及第出身同出身者且

猶沿宋制而四甲五甲則無之邵子湘書朱文公同年
錄記後云宋制科分五等而進士分三甲自太平興國
八年後遂爲定制錄中載公名第五甲第九十名友人
林路言不知五甲之制按照寧間王安石更定科舉法
殿試分五等其第五等賜同學究出身而後沿之而
不變或遂以五等爲五甲耶按宋制一甲二甲賜進士
及第三甲四甲賜進士出
身五甲賜同進士
出身見錄

宋同年小錄存於今者惟文信公及王佐二榜王佐榜
以朱子之故得傳然尤玘萬柳溪邊舊話云文簡公謂
尤
表二十二歲名冠南宮廷擬狀元因不呈卷秦檜易以

王佐是佐之得元由檜所取其人蓋不足重又按王佐榜題名碑是科御試勅差初考官沈該吳梟陳敬之覆考官李朝正湯思退沈介詳定官詹大方張杞王之望皆無檜名或檜有所授意耳尤表名列三甲三十七實三甲之末潛研堂金石文字跋尾云是科徐履以省元殿五甲未詳其故後讀張荃翁貫耳集稱淳熙闕省元徐履因功名之念太重遂有心恙之疾殿試卷子寫一枝竹題曰畫竹一竿朝廷亦優容之以省元身後一官與其子乃知履之殿甲蓋因心疾所致然履乃紹興進士荃翁以爲淳熙則記憶之誤耳然則文簡亦非名冠

南宮舊話所述未可盡信也

李心傳繫年要錄云初奏董德元爲首陳孺次之旣而以事故遞降遂擢佐爲首是文簡固未嘗擬元也

宋慕容彥逢摛文堂集卷七有賜大遼國賀天甯節人使朝見訖歸驛賜酒果口宣胡宿文恭集卷二十七有皇帝賀大遼太后生辰書又有賜契丹人使茶藥口宣蓋當時或稱契丹或稱大遼各從其便

又按宋人多稱遼使爲北使

陳曩鄺齋雜記云西藏番民見漢官制帽頂禮伸舌者三見達賴班禪與大頭人同以伸舌爲禮眞異俗也

又云西藏刑法甚酷不論罪之輕重皆拘繫於黑房繩

縛四肢以待援法搶奪刦殺者不分首從皆擬死或縛于柱上施以鎗箭較射飲酒爲樂或送曲水蠲子洞令螯之或送貉貍國野人分食其肉

國朝堂子之祭事近祕密至今漢講官不侍班滿講官侍班者言祭時鐙燭皆滅亦可異也禮親王昭槤嘯亭雜錄以爲祭鄧子龍楊賓柳邊紀略云奉天多鄧將軍廟將軍名佐成化間人按四鎮三關志鄧佐者定遼前衛指揮使也成化三年隨總兵施英拔奉集堡遇敵二千餘佐率五百騎敗之復追至樹遮里峻山峭壁中鏖戰忽有一校策馬退走衆遂潰乃下馬步戰久之知不

可爲遂自刎守臣上其事立祀遼陽都御史吳禎爲撰
碑記或曰京師堂子所祀亦將軍云案大清一統志鄧
將軍祠在遼陽州城南明宏治間爲都指揮使鄧佐建
是鄧佐爲有明死事之臣且有廟於遼陽矣彭孫貽客
舍偶聞云九月朔當是康熙戊申歲駕出東直門迎鄧將軍神
主入大內黃幄列輿輦前上親拜祭詢諸故老鄧將
軍何人乃勞萬乘躬祭或曰將軍島帥毛文龍部下善
鬪戰沒有神靈立廟島上太祖起兵時戰急甚危求
庇於神顯靈脫於難立廟遼陽每祭必先之元旦亦先
必謁廟躬奠致敬否則宮中時時爲厲按毛文龍與太祖同時其部

將戰沒立廟未必爲太或曰將軍明之有功將帥戰

祖所禱祀此說似非事實沒海上者也考明將帥死遼事無鄧將軍其人者按此

蘇佐萬歷征朝鮮副將鄧子龍數有功戰死海上豈其

神耶將軍英烈沒而有神固宜查慎行人海記云元旦

堂祭乃鄧將軍廟也在朝門之巽隅自車駕外侍從皆

匍匐而入非親暱不隨行將軍諱子龍南昌人萬歷中

副總兵劉獻廷廣陽雜記曰梁質人汾云今堂子所祀

鄧將軍諱子龍江西南昌豐城之間人事母至孝入行

伍以功得官後起爲遼東遊擊將軍死王事云是以堂

子爲祭鄧子龍其說較確又沈國元從信錄云萬歷二

十六年十一月副將鄧子龍以剿倭陣亡伍袁萃林居漫錄云倭寇朝鮮崑田邢公往救副將楊元與倭戰大敗遁回會倭酋死其將引眾去遣副將鄧子龍躡之亦敗沒竟以平倭大捷聞冒濫恩賞焉按東西年表萬歷戊戌平秀吉卒朝鮮平

張文虎舒藝室隨筆

卷一

云寅饑納日與上寅賓出日相

對賓饑有迎送之意馬注饑爲滅敬滅納日不辭鄭謂秋分夕月亦不可以釋納日史記五帝本紀高辛氏脩日月而迎送之蓋卽賓饑之義匈奴列傳單于朝出營拜日之始生今回國風俗每晚向西送日

見西域間見錄

皆古

禮之僅存者歟余謂凡人舉首見天而天之大明莫著於日故祭天祭日以民生之自然無待於聖神之化導亦無煩於彼此之沿襲也嘯山謂匈奴回國古禮僅存固非事實而釋堯典之寅饒爲送日之禮則當與經義相符馬注敬滅滅與沒同正當謂日沒之敬也張氏譏之誤矣

李思倫白

英吉
利人

萬國通史前編卷二云埃及最貴之神

曰禰譯言日也謂日爲太上之眞神卽宰物之眞主又漸分爲數神初出時新氣勃發日爲好鷺好鷺者青年掌陽世之神也將沒時日爲奧山烈司奧山烈司者暮

年掌陰界之神也故摹刻好鷺之容爲盛年麗都之子
執長矛將逐矮帕魄而殺之矮帕魄者幽闇之神也好
鷺旣誅矮帕魄卽化幽闇而現光明遂變暮而爲旦摹
刻刻與山烈司之狀貌爲皤然老叟旁侍傭奴十二人
謂神寶率之以分司夜間十二小時也與山烈司之妻
則曰娛西於是一禩之外有三神按此記埃及古事皆
在五六千年以前是埃及之事日先於堯舜之世固知
西方典禮不宜附會以爲沿於中國也

祁鷺舉回俗紀聞云回俗無跽拜惟納馬茲始跽拜納
馬茲者送日西入禮拜之名

唐僧一行大日經義釋次世出世護摩法品第二十七
云彼行法者日未出時合掌東方望日日出卽拜謁誦
咒以此火神法作之至日欲沒又向西送之如上法每
日如此是送日之禮婆羅門教亦有之

史記封禪書始皇東游海上祠八神七曰日主祠成山
成山斗入海最居齊東北隅以迎日出云

續漢禮儀志上劉昭注魏文帝詔曰漢時不拜日於東
郊而且夕常於殿下東面拜日頗幾似家人之事非事
天交神之道也於是朝日東門之外將祭必先夕牲其
儀如郊按漢世旦夕拜日夕拜卽送日入也東面疑是

東西之誤蓋且則東拜夕則西拜耳

江陰鳳韶有經學吳縣亦有鳳姓皆自言南詔閣羅鳳
之後由質子入唐其苗裔以鳳為姓誌不忘也按神仙
傳鳳綱者戰國時漁陽人是唐前已有鳳姓

周苻農閣學思益堂日札云本朝進士題名碑錄榜花

各姓則有青伯昌順治丙戌河南洛陽人侶驚舉順治己亥直隸南豐人寶

王紘康熙丁未山東萊蕪人茹薦馨康熙己未浙江長興人昂康熙乙丑

江南合戰殿邦東膠州人雒倫康熙甲戌河南武陟人叱康熙正

癸酉陝西祕象震雍正甲辰直隸故城人綏山鵬乾隆甲戌陝西廊州人拱

翊乾隆丁丑廣西桂林人侍朝乾隆庚辰江蘇泰州人粘克昇乾隆戊戌福建晉江

人要問政

乾隆甲辰山西太谷人

算命理學以星度爲言者皆本於西域穆尼問天步眞原之說與張果星宗固同出一源也白羊金牛等十二宮名義原出大集日藏經云昔在殊致羅婆菩薩受龍王請始說十二宮及星象厯數蓋以星紀爲磨羯元枵爲寶瓶娠訾爲雙魚降婁爲白羊大梁爲金牛寶沈爲陰陽鶉首爲巨蟹鶉火爲獅子鶉尾爲雙女壽星爲天秤大火爲天蝎析木爲人馬張果星宗卷一已載之其恩星難星等名卽照星許星之類也聿斯經雖不傳而張果星宗頗引之歲星交會章云巨蟹宮中如會遇少

年榮折桂枝香

謂木亭

又有韓魏公呂僕射語則宋人書

也但皆七言韻語當是聿斯歌耳書錄解題有青羅布

衣王希明聿斯歌星宗又引樞要歌源髓歌之類大抵

皆西方之學裨編

見圖書集成藝術典六百三十

王應麟云以十一星

行厯推人命貴賤始於唐貞元初都利術士李弼乾聿

斯經本梵書程子謂三命是律五星是厯晁氏謂泠州

鳩曰武王伐殷歲在鶉火月在天駟日在析木之津辰

在斗柄星在天龍五星之說其來尙矣又按唐宋命書

雖出西學而多以中學入之與天步眞原之派純用西

學者稍異惜溫明叔侍郎未嘗攷索及此如琴堂指天

歌所云土埋雙女木打寶瓶水泛白羊金騎人馬之類

其十二宮從天竺之名而五星用中國之號其雜糅可

知也吉凶時日善惡宿曜經二十七宿除牛宿十二宮圖

第一羊宮翼第二牛宮角第三男女宮氏第四蟹宮心

第五獅子宮箕第六女宮女虛第七秤宮室壁第八蝎

宮雙第九弓宮畢第十磨羯宮井第十一寶瓶宮鬼

第十二魚宮星男女宮卽陰陽弓宮卽人馬蓋譯者稍

異

地理正宗圖書集成藝術典六百七十九楊筠松字叔茂贛州人亦不

知筠松名益

向來堪輿家分巒頭理氣兩宗互爲軒輊莫衷一是然
形勢之學殊於五行漢志猶可考也管氏地理指蒙一
書圖書集成載之雖出依託猶多雅言惟飾方術術篇
九宮圖後云凡是局例固非五行二氣之法程然來山
去水亦不淫而不雜是爲術術之機緘庶速人之見納
此則理氣一門乃爲售技而設嘻可怪也青囊經云楊
公養老看雌雄天下諸山對不同昔順德李仲約侍郎
爲余言此開卷言養老二字明是筠松暮年倦於登陟
冥憶平生所歷而以地羅格之斯得之矣術數之學遠
有師承辭章藝文亦宜留意茹敦和存格盤說

竹香齋
古文卷

上云格盤迷悶踰塞了無深信趙汭葬書問對以爲非江西之傳斥爲閩巫之邪說其徒劉青田周景一之屬亦以爲可廢雖然予嘗讀禮運之篇至天秉陽垂日星地秉陰竅於山川則憬然曰此非葬家之說乎非葬家之說何以言竅乎又曰播五行於四時此非格盤之說乎至於和而月生三五盈闕則二十四氣并納甲之說皆概之矣還相爲宮而納音之說亦著之矣余謂術數家紛紛異同各以性之所近取之何必是丹而非素乎吉凶時日善惡宿曜經祕密雜占品後附云唐用二十八宿西國除牛宿以其天主事之故十二宮猶唐十二

次

太平廣記

七百七

引逸史裴度少時有術士云命屬北斗

廉貞星神度奉事甚謹

萬國通史前編阿喇伯志曰慕罕默德之教二語蔽之
一曰阿賴按釧琶譯言上帝至尊也二曰倚勢攔譯言
宜敬服之也今泰西人恆取其第二語爲回教之名倚
勢攔卽依石藍之異譯

臨川吳鐸有淨髮須知一卷專言釋家剃度規則與永
樂大典所載迥異

萬國通史前編羅馬志云古人須髮任其生長爲每

日難面之法者賽披噢也沿至海特理安皇卒之世人
恒剪髮使短而難其須海特理安面有疤痕留須不去
大臣從而效之然則今西人短髮長須實用海特理安
之遺制也

史夢蘭止園筆談三金人辮髮見於宋史劉錡傳明朱
國禎湧幢小品云元人入主中國爲士者辮髮短衣效
其言語衣服則辮髮金元皆同鄭麟趾高麗史言蒙
古俗剃頂至額方其形留髮於中謂之開剃與金源制
異

林邑記曰僭耳民好徒跣暑褻薄日白使人黑積習成

常以黑爲美離騷所謂玄國矣

水經溫水注

按此知黑色由

薄日而成不足以爲人種之區別也

宋史藝文志姚舜輔蝕神隱曜厯二卷日本釋圓通佛國厯象編云梵厯之法以羅計二曜爲蝕神頭蝕神尾而梵厯曰羅計常隱行不見舜輔用梵厯燭然可見

東華錄順治十四年夏四月革職欽天監回回科秋官

正吳明炫奏臣祖默沙亦黑等一十八姓本西域人自

隋開皇己未年爲厯元

按此回教紀元之歲

抱其厯學重譯來朝

授職厯官一千五十九載專管星宿行度吉凶每推算

太陰五星陵犯天象占驗日月交食卽以臣科白本進

呈 御覽順治三年本監掌印湯若望諭臣科凡日月
交食及太陰五星陵犯天象占驗俱不必奏進臣查若
望所推七政厯水星二八月皆伏今水星於二月二十
九日仍見東方又八月二十四日夕見皆關象占不敢
不據推上聞乞 皇上立臣內靈臺以存臣科庶絕學
獲傳竝上順治十四年回回科推算太陰五星陵犯書
一部日月交食天像占驗圖象一本事下所司七月吳
明炫又奏湯若望舛謬三事一遺漏紫炁一顛倒觜參
一顛倒羅計蓋回厯本於梵厯亦用羅喉計都也

康熙二十四年十月江蘇巡撫湯斌奏吳郡淫祠有所

謂五通五顯劉猛將五方賢聖等名號皆荒誕不經臣
已收取妖像土偶者投之深淵木偶者付之烈焰檄行
有司凡如此類盡數查毀其房屋木料拆備修學宮之
用余謂淫祀既多邪教卽從之而出惑世不已必且殃
民多神教之弊至於如此則一神教之有益於民蓋可
知矣所以巫風所煽漢宋因之而亡天教盛行歐洲由
其強霸非無故也論國教者於此亦不可不察也

趙鳳北云

鈕玉樵謂妖禍遂絕然實未盡絕也蓋幽
明之際變幻無窮固非令甲所能禁云

趙雲絃絃餘叢攷卷三十云金史及續通攷金哀宗時
蒲察官奴以火槍破敵以紙十六重爲筒實以柳炭鐵

屑磁末硫磺砒硝以繩繫槍端以鐵罐藏火臨陳燬之

火出槍前丈餘元兵不能支遂潰其後阿里海牙攻樊

城時元世祖得回回亦思馬因所獻新礮法

元史世祖徵礮在西

域阿老瓦丁與其徒亦思馬因至造大礮命送軍前乃進攻樊

樊破移以向襄陽一砲中譙樓聲如震雷世所謂襄陽

砲也蓋火砲之製至是而益精且來自西域故世傳爲

西洋礮

按阿里海牙原在阿爾哈雅

姜西溟湛園札記云火砲興於

宋末元初其初猶用石也元史阿穆呼傳對太祖曰攻

城以砲石爲重力重而能及遠故也千萬戶薛塔剌海

來歸太祖命爲砲手從征回回河西等國俱以砲石立

功夏世家有砲手一百人號撥喜陡立旋風砲於橐駝
鞍縱石如拳則此時亦無火砲也阿爾哈雅傳西域人
伊斯瑪獻新礮法因以其人來爲礮攻焚破之時又命
隋世昌立砲簾於城外又張榮從軍下漢江至沙洋以
火砲焚樊城中民舍幾盡遂破之此皆礮之用火攻者
也攷金史特嘉哈希傳則火砲火槍之制金元之際已
有之

雲麓漫鈔

卷十

云列子多非舊文前賢固言之矣

唐施肩吾寺宿爲五通所撓詩五通本是佛家奴身著

青衣一足無

見全唐詩引
海錄碎事

太上胎精記云腦神覺元字道都此言腦爲知覺之元也

後漢書公孫述傳述妄引識記以爲孔子作春秋爲赤制而斷十二公明漢至平帝十二代厯數盡也章懷注引尙書攷靈耀曰孔子爲赤制故作春秋赤者漢行也孔子作春秋斷十二公象漢十二帝

唐虛象有鄉試後自輩還田家詩鄉試二字始此

文徵仲有女適王子美者嘗詠王昭君詩云當時只解誅畫工誰誅婁敬黃泉道用意奇警見余懷東山談苑此吾家閨秀也選明詩者多遺之

趙耘菴餘叢考卷四十一云鄭所南集文丞相家人
皆落元人手獨妹氏更不改嫁謂我兄如此我甯忍耶
惟流落燕山欲歸廬陵不可得是信國亦有賢妹也
韋端己有官莊詩自注云江南富民悉以犯酒沒家產
因以此詩諷之浙帥遂改酒法不入財產其詩云誰氏
園林一簇煙路人遙指盡長歎桑田稻澤今無主新犯
香醪沒入官唐末權酷之政厲民如此

後漢安世高譯阿難問事佛吉凶經云善惡之事由人
心作禍福由人如影追形響之應聲戒行之德應之自
然諸天所護願不意違感動十方與天參德此感應篇

之所本

韓冬郎贈易卜崔江處士詩

自注云袁州

白首窮經通秘義

青山養老度危時云云

韋應物有示全真元常詩全真二字俟攷

皮日休雜體詩序曰晉溫嶠始有迴文詩

薛瑩荆揚巴南異物志

文選吳郡賦注

郭璞注子虛上林賦

見文選注

司馬彪注子虛上林賦

見文選注

文選

卷二

張景陽雜詩注顧子曰登高使人意遐臨深

使人志清顧子卽顧夷義訓

文選卷五十九齊安陸昭王碑注孟子曰江漢以濯之秋陽

以暴之綦毋邃曰周之秋於夏為盛陽也

陶侃捉脈賦圖書集成藝術典六百七十九引地理正宗陶侃字仕衡作捉脈賦

文選卷六任彥昇齊竟陵文宣王行狀注引阮籍奏記

曰將耕東皋之田輸黍稷之視此亦可證阮籍秦記之誤又引孫

放數詩曰一往縱神懷矯迹步玄闡

圖書集成藝術典醫部名醫列傳引醫學入門云殷浩

精通經脈著方書

純常子枝語卷三十三

純常子枝語卷三十四

萍鄉文廷式撰

黑龍江外紀云漢軍果氏以爲係出滿洲瓜爾佳與瓜爾佳氏世不結親余按瓜爾佳今又譯作關關果亦一聲之轉然與金史之夾谷則實不相近外紀又云漢軍其先多出山左齊齊哈爾墨爾根黑龍江三城有之其豪族崔王兩姓崔尤盛號崔半城而東崔不與王氏相傳完顏裔又有果姓以爲系出滿洲余按漢軍佟姓亦云與滿洲同族蓋雜居旣久互爲婚姻有不復能盡識別者矣

西南苗獐各種大抵狃獠之舊俗實有上古之遺風焉
以美洲紅苗臺灣野番證之則此殆卽支那之原產也
今略列諸家所記可以知其種別焉陸次雲尙谿纖志
云苗人盤瓠之種也有白苗花苗青苗紅苗黑苗苗部
所衣各別以色散處山谷聚而成寨睚眦殺人九股苗
在隆興凱里二界宋家蔡家春秋宋蔡二國之後流而
爲蠻按此等殆附會之說未必可信天苗多姬姓周後也尙行周禮祭
祖推其家長唱土語爲讚祝紫薑苗裝束同漢人賣爺
苗在白納克孟牯牛乃二種也處於金筑擇懸崖鑿竅
而居里人亦名天苗身衣木葉狃兜衣青左衽身不離

刀狃老與西苗同俗又有狃獮苗焚人號十二營長獮
鬼狃狃言語不通焚人爲之翻譯狃狃有花狃狃紅狃
狃赤腳善奔布圍下體謂之桶裙有打牙狃狃翦頭狃
狃豬屎狃狃豎眼狃狃黎州蠻白馬氏之裔分十一種
獮獮本名盧鹿有黑白二種黑爲大族深目長身面黑
齒白故名獮鬼金齒古哀牢國其苗人皆九隆之後木
邦一名孟邦其人多幻術老撾徧體花繡俗同木邦猺
一名輦客其種有八是謂八蠻獮人居五嶺之內冬綴
鷲毛木葉爲衣獮人亦名山子處於嶺表海外蠻人又
曰龍戶又曰崑崙奴祭蛇神馬人居林邑伏波戍卒之

遺也深目獬喙

按此則非中原之種也當緣馬留二字而譌

狼人多在南丹

三州狃人生岬巖中形如猿猱語吽嚶不可辨斑衣山子一曰莫徭狔人生廣西奧谷中狀如猩狒黎人生儋崖瓊萬之間遐黎食父母黃纘曾渙行紀程云貴西苗九種大約垂髻垢面語言與黔人不同陸祚蕃粵西偶記云賓州諸處土夷有猺獞狔狼四種狔人最巧可買爲僮僕狼婦獨美嘗繡衣騎牛入市貿易猺有板猺箭猺不下十數種更有一種號山子喜獵不賦不役食盡則徙吳震方嶺南雜記云潮之西北有羣戶者男女椎髻跣足依山而處以射獵爲生舊常設官以治之曰羣

官蠶戶有三種魚蠶取魚蠟蠶取蠟木蠶伐山取木獠
蠻之別種隋唐爲患嶺南然是時不言有獠宋以後又
不言有獠意一種而隨代異名也獠與獠異類而桀獠
性同花衣短裙烏言獸行產自湖南溪峒先入廣西延
至廣東與獠爲讐粵有獠種出於五溪之蠻番禺雜編
云黎人在海南山洞中熟黎亦供州縣之役陳鼎滇黔
紀遊云黔省苗蠻甚多有東苗西苗牯羊苗青苗白苗
谷蘭苗紫姜苗平伐苗九股黑苗天苗紅苗生苗羅漢
苗陽洞苗黑白羅羅八番苗打牙犵狓剪頭犵狓木犵
狓家苗土人苗獠獠苗蠻人苗楊保苗狗耳龍家苗馬

燈龍家苗熨人猗人宋家蔡家共三十餘種宋蔡馬燈
龍家乃戰國時楚伐宋蔡龍三國俘其民放之南徼流
而爲苗知中原禮義衣服祭祀婚嫁一稟於周仲家最
惡而險通漢語知漢書世界地理云中國有拜物教崇
拜一切自然物如苗民之族卽信此教

世界地理謂居中國人約有七種一蒙古族

東部爲蝦拉族北部

喀爾喀亦在其中西部爲隘利由族又喀爾姆克族住於松加利亞庫倫西北蒙古

二通古斯族

住於滿州庫倫

三土耳其族

住於庫倫中部天山塔里木河流域喀什喀爾揚子江之上流

四西藏族

住於森保亞河上流西藏西部西藏中部湖水

地方及中國本部與西藏接境之地自青海起連亘雲南

五漢族

住中國本部之北部及中部廣東福建庫倫甘肅松加利亞其中以居于中國本部北部及中

部者爲

真漢族在廣東福建者爲哈加族在甘肅松加利亞克爾加者爲登耕族按哈加當作客家今江西福

建等府縣猶編客籍是也或曰客加乃

疍家之轉音蓋疍佬種也其語音皆與廣東嘉應州語相近

六住於高地之民族

此種之關係未甚分明即居于四川省之南部及西部雲南省之北

部及西部依拉瓦諦河之上流瓊州島之一部貴州之

高地西藏之東南部者是也苗族爲其代表漢人放逐苗民於此遂創建邦土云

七住於喀什喀爾庫倫塔里木河盆地下部及青海者

按此所言亦大粗略不足盡中國種族之學明倫察

物通其意者將有待焉

乾隆四十二年八月十九日 上諭云我朝肇興古肅
慎地東夷之說因地得名如孟子稱舜東夷之人文王
西夷之人此無可諱亦不必諱按因地得名之說足破
萬古拘墟之見今時交涉諸國乃力爭不用夷字以爲
醜詆之詞其識轉隘矣

民種之學西人多好稽攷而中國古書亦往往及之特
不能詳盡耳余謂堯典所言析因夷隩實言民種之始
非謂農事也至周禮大司徒以土會之灋辨五地之物
生山林民毛而方川澤民黑而津丘陵民專而長墳衍
民皙而瘠原隰民豐肉而痺雖未言其所出之原而其

因所居而異者實已明言其故是以爾雅釋地云距齊

州以南戴日爲丹穴

郭注齊中也

北戴斗極爲空桐東至日

所出爲太平西至日所入爲大蒙太平之人仁丹穴之

人智大蒙之人信空桐之人武蓋以日星定中國之四

極而略區別其人之性情雖以仁武智信配東西南北

而同謂之極卽同謂之中

邢疏云極者中宮天極星其一明者泰一之常居以其居

天之中故謂之極極者中也

與九夷八狄七戎六蠻晦於禮義謂之

四海者固截然異稱也

據孫炎注云海之言晦晦闇於禮義也然則夷狄與中國異稱

者在禮義之有無故四極分仁武智信而不言禮義者

以禮義乃中國所共有不以四方異俗也禮義有無遂

分夷夏而種族亦由同而之異矣張茂先博物志云東方少陽日月所

出山谷清其人佼好西方少陰日月所入其土窈冥其
人高鼻深目多毛南方太陽土下水淺其人大口多傲
北方太陰土平廣深其人廣面縮頸中央四折風雨交
山谷峻其人端正此略言其形體之異尸子曰四夷之
民有贊匈者有深目者有長肱者黃帝之德常致之郭璞
海外南經山海經所載海外南經有結匈國羽民國謹
注引之頭國厭火國三苗國載國貫匈國交脰國歧舌國鑿齒
三首國周饒國一日焦長臂國海外西經有三身國一
臂國奇肱國丈夫國巫咸國女子國軒轅國白民國肅
慎國長股國海外北經有無臂國一目國柔利國深目

國無腸國聶耳國博父國拘纓國跂踵國

大踵海外東

經有大人國君子國青丘國黑齒國玄股國毛民國勞

民國海內南經有伯慮國離耳國雕題國北胸國梟陽

國氐人國匈奴

一日獫狁

開題之國列人之國海內西經有

東胡夸人貊國海內北經有犬封國曰犬戎國鬼國林

氏國蓋國南倭北倭朝鮮姑射國海內東經有國在流

沙中者埤端璽喚國在流沙外者大夏豎沙居繇月支

之國大荒東經有大人之國

海外東經有之

小人國有焉國君

子之國

海外東經有之

白民國

海外西經有之

青丘國

海外東經有之夏州

國蓋余國困民國女和月母之國大荒南經有三身國

海外西經有之盈民國當卽裁國海載民國外南經有之蚺民國有小人

曰焦僥之國海外南經有之有馳姓之國驩頭之國驩頭之國海外南經有之義

和之國大荒西經有淑士國白氏國長脰國西周國此案

以姬周列之先民國有沃國女子國海外西經有之丈夫國海外

大荒不可解有之寒荒國壽麻國蓋山國互人國大荒北經有胡不

與之國肅慎氏之國始州國毛民國海外東經有之儋耳國深

口民之國海外北經有之中輻國賴丘國犬戎國海外西經有之海內

經有朝鮮海外北經有之天毒壑市汜葉朝雲司龜禺中鹽長

巴國又有輶巨人注以爲卽梟陽也海外南經有之有玄丘之

民大幽之國釘靈之國其可攷於今者十之三四卽不

可攷者亦未可言古之必無然其命各國之名則大端就形體而言而以地名者絕鮮此卽分種族之學淮南子墜形訓云凡海外三十六國自西北至西南方有修股民天民肅慎民白民沃民女子民丈夫民奇嵇股民一臂民三身民自西南至東南方結胷民羽民謹頭國民裸國民三苗民交股民不死民穿胷民反舌民豕喙民鑿齒民三頭民修臂民自東南至東北方有大人國君子國黑齒民玄股民毛民勞民自東北方至西北方有跂踵民句嬰民深目民無腸民柔利民一目民無繼民大抵依據山海經非別有所出萬國史記卷五云亞

非理駕人常傳其東南各部語率怪誕無稽或曰東南
海濱有人男女皆無鼻或曰具三四眼或曰眼在胷無
首以上古書又稱某王頭如犬某地有長人長數丈更
有矮人一種曰比鶴美士長可一尺住尼羅河源云知
當時中西傳聞約略相似矣今以西書言中國種族者
多未明其源委爰拊拾經史粗具崖略使來者可因以
理董焉

史記五帝本紀曰三苗在江淮荊州數爲亂於是舜歸
而言於帝請流其工於幽陵以變北狄

索隱變謂變其
形及衣服同於

夷狄也正義言四
凶流四裔各於
四夷放

放驩兜於崇
共工等爲中國
之風俗也按正
義說是

山以變南蠻遷三苗於三危以變西戎殛鯀於羽山以變東夷

張華博物志卷二曰三苗國昔唐堯以天下讓於虞三苗之民非之帝殺有苗之民叛浮入南海爲三苗國書舜典竄三苗於三危僞孔氏傳云三苗國名縉雲氏之後爲諸侯號饗饗三危西裔

又分北三苗正義引鄭玄以爲流四凶者降其位耳猶爲國君故以三苗爲西裔諸侯猶爲惡乃復分北流之謂分北西裔之三苗也

呂刑苗民弗用靈制以刑惟作五虐之刑曰法殺戮無

辜爰始淫爲劓刵椓黥僞孔傳云三苗之主頑凶若民敢行虐刑以殺戮無辜故曰五虐

禹貢三危旣宅三苗丕敘史記丕敘作大序索隱云鄭玄引河圖及地說云三危山在鳥鼠西南與岐山相連尙書正義云三危山未知所在地理志杜林以爲燉煌郡卽古瓜州也昭九年左傳云先王居橐杌於四裔故允姓之姦居于瓜州杜預云允姓之祖與三苗俱放於三危瓜州今燉煌也

淮南子脩務訓舜南征三苗道死蒼梧

皋陶謨曰何遷乎有苗

史記吳起列傳吳起曰昔三苗氏左洞庭右彭蠡德義不脩禹滅之

輿地廣記潭州古三苗國之地

禮緇衣甫刑曰苗民匪用命制以刑惟作五虐之刑曰法是以民有惡德而遂絕其世鄭注高辛世之末諸侯有三苗者作亂其治民不用政令專制之以嚴刑乃作五虐蚩尤之刑以是爲法於是民起倍畔三苗由此見滅無後世正義案鄭注呂刑云苗民謂九黎之君也九黎之君於少昊氏衰而棄善道上效蚩尤重刑必變九黎言苗民者有苗九黎之後顓頊代少昊誅九黎分流

其子孫爲居於西裔者三苗至高辛之衰又復九黎之

君惡堯興又誅之堯末又在朝舜時又竄之後王深惡

此族三生凶惡

三生二字用釋典未安

故著其氏而謂之民民者

冥也言未見仁道

按民無貶義特著其上下同亂耳

又云鄭以九黎爲

苗氏先祖上學蚩尤之惡非蚩尤子孫孔注尙書以爲

九黎卽蚩尤三苗則非九黎子孫與鄭異

穆天子傳卷四天子至重黿氏黑水之阿又柏天曰重

黿氏之先三苗氏之口處郭注云三苗舜所竄於三危

山者

近人苗疆聞見錄云麻哈州元犵狁長官司地獨山州

元獨山蠻夷長官司地

五大洲各國風俗攷曰亞細亞爲人類淵藪民種不可
以僂指數高加索種居亞細亞西方蒙古韃靼種居亞
細亞東方巫來種居印度羣島依諦號比亞種分居東
南洋各島高加索種最佳蒙韃種亦多智謀之士該爾
毛克民種爲蒙韃分支習牧業居亞細亞中土之平地
心思靈敏而骨格相稱巫來種膚色稍暗髮粗而黑目
細而彎種之大而多者首推蒙古高加索次之巫來又
次之依諦號比亞最少此一種今稱爲巴布亞種按此
西人約略之詞且旣云不可勝數何所舉僅五種耶類

族辨物先王相傳之學余固當修明之以存吾洲之訓
典也

水經大遼水注高平川水出西北平川東南過倭城北
蓋倭地人徙之據此則倭人由東方以通中國其來已
久高誘注呂氏春秋有倭語二字不足異也

萬國史記卷二云中國在亞細亞之東疆域廣大殆居
亞細亞三分之一分爲三部按此日本人約曰本部曰

中國韃靼曰西藏其本部最稱舊國自有史記四千餘

年

說文久部夏中國之人也

大戴禮五帝德篇流其工於幽州以變北狄放驩兜於崇山以變南蠻殺三苗於三危以變西戎殛鯀於羽山

以變東夷

史記五帝本紀殺作遷殺乃桀之借字

王筠莖友臆說云此較左傳投諸四夷以禦魍魎更見聖人作用其工驩兜鯀在中國爲凶人在四裔猶可化獠狁之民因所長而用之也禹貢三危旣宅三苗丕敘此卽以變西戎之實余謂離騷言鯀婞直以亡身終天乎羽之野蓋言行化變夷之事矣

汪大淵島夷誌略云龍牙門昔酋長掘地而得玉冠今亦遞相傳授男女兼中國人居之多椎髻穿短布衫繫

青布捐

徐繼畲瀛環志略卷二引泰西人萬國地理書云南洋諸島沿海土人皆巫來由番族黑面長髮頭纏布赤足腰圍花紋布穿襪插短刀多駕船捕魚或爲海盜皆奉回回教內地有黑面土番居山穴樹林如中國苗獠之類中國流寓甚眾廣州嘉應州之人爲工潮州之人爲農泉漳之人爲商閩粵游手往往不復首邱或娶番婦生子女遂化爲異族

瀛環志略又云天下郡國利病書謂真臘民色甚黑號爲昆侖唐時所謂昆侖奴也今攷南洋諸島番面色大

半皆黑不獨眞臘且黑有甚於眞臘者

汪大淵島夷誌略天竺居大食之東隸秦王之主俗尙古風男女身長七尺小目長項手帕繫額編髮垂耳穿百結衣以簾皮織鞋以棉紗結襪

又云麻訶斯離去大食國八千餘里男女編髮眼如銅鈴穿長衫

太平御覽

卷一百七

引廣志曰黃頭夷髮黃如菰籍

鄒代鈞西征紀程卷二云錫蘭島民種類凡四曰新格利斯種周秦之際遷自北印度乾吉思河畔至今爲最繁衍短軀幹膽小而詐弱不任事曰坦彌爾種遷自南

印度居嶺北曰摩哈默種阿剌伯回教也人性伉爽善商賈曰法答種土人也貧苦無知識居樹林中與獸無異

滿洲語稱老翁曰薩克達嗎甫故薩克達氏自稱晉祖逖之後又瓜爾佳氏自稱漢前將軍關羽之後則以關瓜爲對音字凡滿洲人姓馬佳王佳李佳等字皆借用作家雖奉旨不許妄增然莫能禁也又他塔喇漢姓

亦見西齋偶得

曰唐棟鄂氏自言宋瀛國公之後白虎通禮樂篇曰何以名爲夷蠻曰聖人本不治外國非爲制名也因其國名而言之耳按名從主人春秋之

大義白虎通此說最爲得之其下文又錄一說曰名其短而爲之制名也夷者傳夷無禮蠻蟲難化戎者強惡狄者辟易無別云云此皆後人因聲音以附會乃後起義凡類此者今皆不取

此猶夏殷周皆以地名而白虎通號篇亦有夏大殷中周密之

訓小學家習氣如此也

禮記王制東方曰夷被髮文身有不火食者矣南方曰蠻雕題交趾有不火食者矣

鄭注雕題謂刻其肌以丹青涅之交趾足相鄉然浴

則同川臥則併不火食地氣暖不爲病

西方曰戎被髮衣皮有不粒食者

矣北方曰狄衣羽毛穴居有不粒食者矣

鄭注不粒食地氣寒少五

穀

中國夷蠻戎狄皆有安居五方之民言語不通嗜欲

不同達其志通其欲東方曰寄南方曰象西方曰狄鞮

北方曰譯正義曰東方曰夷者風俗通云東方人好生

萬物觝觸地而出夷者觝也其類有九依東夷傳九種

一玄菟二樂浪三高麗四滿飾

按卽靺鞨之異文

五鳧婁

按卽扶餘

之異文

六索家七東屠八倭人九天鄙案韓非子說林上

云周公旦已勝殷將攻商蓋辛公甲曰大難攻小易服

不如服眾小以判大乃攻九夷而商蓋服江良庭曰商

蓋商奄也是九夷曾爲周公所征朝鮮又被箕子之教

故孔子欲居之矣南方曰蠻者風俗通云君臣同川而

浴極爲簡慢蠻者慢也其類有八李巡注爾雅云一天

竺二咳首三僬僬四跛

當作

踵五穿胃六僭耳七狗軼

八旁春

阮文達校勘記云皇侃論語疏作旁脊

西方曰戎者風俗通云斬

伐殺生不得其中戎者凶也其類有六李巡注爾雅云

一僬夷二戎央

校勘記云毛本央作夷皇疏作依類

三老白四耆羌五鼻

息六天剛北方曰狄者風俗通云父子嫂叔同穴無別

狄者辟也其行邪辟其類有五李巡注爾雅云一月支

二穢貊三匈奴四單于五白屋按後漢書九夷畎夷于

夷方夷黃夷白夷赤夷玄夷風夷陽夷此所稱玄菟樂

浪云云當引李巡爾雅注段茂堂補之是也穢貊乃東

夷單于乃匈奴王稱強以足五狄之數不足盡據說文

羊部羌西戎牧羊人也从人从羊羊亦聲南方蠻閩从虫北方狄从犬東方貉从豸西方羌从羊此六種也西南蠻人僬僥从人蓋在坤地頗有順理之性唯東夷从大大人也夷俗仁仁者壽有君子不死之國孔子曰道不行欲之九夷乘桴浮于海有以也此以夷爲美稱至虫部又以閩爲蛇種犬部以狄爲犬種豸部貉字又云北方豸種此與羌字下以貉爲東方者互異皆隨字附會不如羌字釋爲牧羊人而不言羊種較得本義禮記明堂位正義曰鄭志趙商問曰職方掌四夷八蠻七閩九貉五戎六狄之數注云周之所服國數明堂云朝位服事之國服夷

九蠻八戎六狄五禮文事異不達其數故鄭答云職方

四夷謂四方夷狄也九貉卽九夷

此與說文言貉在東方說合

在東

方八蠻在南方閩其別也戎狄之數或六或五爾雅雖有與同皆數爾無別國之名不甚明故不定也如鄭此言夷狄之名旣無別國顯其名數或五或六不可知也竊意鄭不獨不定戎狄之五六卽九夷八蠻鄭亦不欲妄指國名以實之如李巡應劭之言皆鄭所不取也

李石續博物志卷二曰寧國論云蜀中木無獠犍爲德陽山谷洞中攘攘而出轉轉漸大白爲夫婦而益多夫土乾則生蚤地溼則生蚊積穀則生蠹腐肉則生蛆蛆

化爲蠅蠅自生蛆蛆又生蠅豈有窮乎按種族每因地氣而變此以土乾生蚤地溼生蚊爲喻未爲不合

宋周去非嶺外代答云欽民有五種一曰土人曰昔駱越種類也居於村落容貌鄙野以唇舌雜爲音聲殊不可曉謂之龔語二曰北人語言平易而雜以南音本西北流民自五代之亂占籍於欽者也三曰俚人史稱俚獠者是也此種自蠻峒出居專事妖怪若禽獸然語音尤不可曉四曰射耕人本福建人射地而耕也子孫盡閩音五曰蜑人以舟爲室浮海而生語似福建雜以廣東西之音三卷又曰方言古人有之乃若廣西之龔語稱

官主爲溝主母爲未囊外祖母爲低僕使曰齋粹喫飯
爲報崖若此之類當待譯而後通至城郭居民語乃平
易自福建湖湘皆不及也卷四按據此則自桂林至欽州
皆有夔語當爲其地最古之士人特不知越南語與夔
語異同若何耳

水經溫水注云林邑記曰渡比景至朱吾朱吾以南有
文狼人野居無室宅依樹止宿食生魚肉採香爲業與
人交市若上皇之民矣余按今南洋多巫來山種巫來
由蓋卽文狼之音轉今譯者亦或作文萊

萬震南州志大月氏在天竺北可七千里國王稱天子

國中騎乘常數十萬匹城郭宮殿與大秦國同人民赤

白色

見大宛列傳注

按此以顏色分民實開西學之先月氏民

赤白色則西歐人種之所始也

史記匈奴列傳匈奴其先祖夏后氏之苗裔也曰淳維

索隱張晏曰淳維以殷時奔北邊又樂彥括地譜云夏桀無道湯放之鳴條三年而死其子獯粥妻桀之眾妾避居北野隨畜移徙中國謂之唐虞以上有山戎獫狁

匈奴其言夏后苗裔或當然也

葷粥居于北蠻隨畜牧而轉移其俗有名人不諱而無姓

字

集解漢書曰單于姓攣提氏

案禹貢要服外五百里荒服三百里

蠻二百里流史記集解引馬融曰流行無城郭常居蓋

蠻卽北蠻流卽隨畜牧轉移後世所謂行國也

史記五帝本紀東長島夷索隱云長字下少一夷字今案大戴禮亦云長夷則長是夷號正義注島或作島括地志云百濟國西南海中有大島十五所皆置邑有人居屬百濟又倭國西南大海中島居凡百餘小國在京南萬三千五百里案武后改倭國爲日本國余案任昉述異記云日本國有金桃其實重一斤是日本之名不始於武后

蔡澄雞窗叢話云後漢書外國傳引王制曰東方曰夷夷者抵也或曰夷大也柔順也言仁而好生萬物抵地而出故天性柔順易以道御至有君子不死之國焉山

海經曰君子國衣冠帶劍故唐元宗稱日本爲禮義君子國論語子欲居九夷或曰陋子曰君子居之蓋孔子以彼有君子居之非自謂君子也不死國非竟不死也日本吾妻鏡載其國王漢晉以前壽皆百數十歲又有大臣曰內紀武年三百七歲按九夷卽古之倭奴余謂此不然至唐改爲日本新羅百濟等國亦九夷之後東夷列傳九夷畎夷于夷方夷黃夷白夷赤夷玄夷風夷陽夷余謂方夷當卽周禮所謂其民毛而方也黃白赤玄者就各國人之顏色言之也猶西洋之分黑白倮子也書舜典蠻夷猾夏孔氏傳曰夏華夏是姁氏以前中國

已有夏稱正義引定十年左傳云裔不謀夏夷不亂華是中國爲華夏也然中國何以名華夏之故則各書皆附會字義以釋之而未明言其所以然竊意古人質樸必不取光華夏大之訓自表異於人疑必取於地名以分種族而後世遂沿爲美稱矣汨作序云帝釐下土方設居方別生分類孔氏傳曰生姓也別其姓族分其類使相從此古人言種族之學旣別其姓又釐其居舜之大功蓋在於此乃不傳於後惜哉

史記衛青傳殺折蘭王正義顏師古云折蘭匈奴中姓也今鮮卑有其蘭姓者卽其種余按鮮卑匈奴種族略

異顏監之言似未足據

史記封禪書齊桓公曰寡人北伐山戎索隱服虔曰蓋

今鮮卑是元祕史之失必兒本朝之錫伯滿洲

此語記博習明

西齋偶得言之皆鮮卑之音轉也今俄羅斯西伯利

蓋卽失必兒譯音無定字耳

水經河水篇注云洮水逕吐谷渾中吐谷渾者始是東

燕慕容之枝庶因氏其字以爲首類之種號也故謂之

野虜

欽定滿洲源流考卷十八云通考新羅族第一骨第二
骨以自別王族爲第一骨妻亦其族不娶第二骨此承

新唐書之誤據史新羅王金姓自以金姓爲第一骨而
唐時冊命國妃太妃皆申姓朴姓之屬載於冊府元龜
及唐書厯厯可攷無一金姓則所云妻不娶第二骨者
傳註之辭今蒙古以黑白骨分貴賤有察罕雅蘇台哈
喇雅蘇台之稱新羅以骨爲重亦卽其意耳余案緬甸
國俗亦以骨分貴賤又黃遵憲日本國志卷三十七引
姓氏錄曰源朝臣信弟妹凡八人宏仁五年各賜姓以
信爲尸主又姓氏錄序名爲氏骨骨之爲言主也氏骨
者言氏族之所以爲主余謂骨無主義或亦同新羅之
俗以骨爲別歟

國語鄭語曰荆子熊嚴生子四人叔熊逃難於濮韋氏解曰濮蠻邑遠氏楚大夫先熊霜之世叔熊逃難奔濮而從蠻俗

又曰祝融後八姓已董彭禿妘曹或在王室或在夷狄莫之數也韋注云在王室蘇子溫子也在夷狄菑偁陽也

晉語狐氏出自唐叔注云狐氏與晉俱唐叔之後別在犬戎者

書費誓淮夷徐戎孔氏傳曰此戎夷帝王所羈縻統緒故錯居九州之內秦始皇逐出之正義曰漢時內地無

戎夷者秦始皇逐出按晉江統徒戎論曰周室失統戎狄乘閒得入中國或招誘安撫以爲己用自是四夷交侵與中國錯居及秦始皇并天下兵威旁達攘胡走越當是時中國無復四夷也說與僞孔傳同江統以馬援徙羌爲夷狄入中國之始通典以趙充國爲始兩說互證

隋圖經集記曰義川蓋春秋時白翟也其俗語云丹州

白空卽白翟語訛耳

太平御覽州郡部

苗疆聞見錄云台拱廳西北九股河一曰小江自丹江流入下注清水江沿江以居者曰九股苗曰橫披苗通稱黑苗最爲獷悍迤西而北而東山峯屹立廳南烏堯

坡高數萬仞山峻溪深寸步百險西南平行煙火萬家
南冬南省南兒南堯腮隴桃瀨等苗寨形如棋布皆黑
苗種類清江廳屬清江苗亦曰青苗都勻府境羊獯苗
大都瀕河以居其依山爲險者則獠犵夷也麻哈州紫
蘆苗夾樂平溪而居獨山州境短髮苗亦曰狎家苗八
寨廳蠻夷環伺曰八砦苗曰千家苗曰九門苗種類不
一丹江廳有大丹江苗小丹江苗又有高坡苗其婦女以木板
尺許縮髮亦雞講苗錯處於東北高坡雞講之間都江
謂之頂板苗廳爲水家苗地古州廳多蠻夷曰梅得苗曰奔頭苗曰
八萬古州苗永從縣唐溪洞福祿州在黎平府東南六

十里多洞苗曰六洞曰四腳牛尤獷悍六洞一名六寨
又有外八洞苗

隋書地理志云漢中傍南山有獠戶富室者頗參夏人
爲婚衣服居處言語殆與華不別漢陽臨洮宕昌武都
同昌河池順政義城平武汶山皆連接氏羌人尤勁悍
又云又有獷獠蠻賚其居處風俗衣服飲食頗同於獠
而亦與蜀人相類

水經江水篇注熨道縣本熨人居之地理風俗記曰夷
中最仁有人道故字從人按此應仲遠釋熨字之說

水經青衣水出青衣縣酈注云縣故青衣羌國也竹書

紀年梁惠成王十年瑕陽人自秦道岷山青衣水來歸
又若水注云汶山曰夷南中曰昆彌蜀曰邛漢嘉曰茆
皆夷種也

隋書地理志南郡夷陵竟陵沔陽沔陵靖江襄陽沔陵

漢東安陸永安義陽九江江夏諸郡多雜蠻左

楊守敬按地形志齊有安蠻左郡宋有希水左縣斷水左縣

齊有建寧左郡宋有建寧左縣齊有北隨安左郡其

與夏人雜居者則與諸華不別其僻處山谷者則言語

不通嗜好居處全異頗與巴渝同俗諸蠻本其所出承

盤瓠之後故服章多以班布爲飾其相呼以蠻則爲深

忌晉氏南遷之後南郡襄陽皆爲重鎮四方湊會故益

多衣冠之緒稍尙禮義經籍焉九江襟帶所在江陵竟陵安陸各置名州爲藩鎮重寄人物乃與諸郡不同水經沅水注武陵有五溪雄溪楠溪無溪酉溪辰溪夾溪悉是蠻左所居故謂此蠻五溪蠻也

隋書地理志云長沙郡又雜有夷蠻名曰莫徭自云其先祖有功常免徭役故以爲名其男子但著白布襌衫更無巾袴其女子青布衫班布裙通無鞋屨婚嫁用鐵鉗鏹爲聘財武陵巴陵零陵桂陽澧陽衡山熙平皆同焉其喪葬之節頗同於諸左云

陸游老學菴筆記

卷四

云辰沅靖州蠻有狔狔有狔獠有

狔獾有狔獾有山徭俗亦土著外愚內黠皆焚山而耕
所種粟豆而已其負物則少者輕老者重率皆束于背
婦人負者尤多男未娶者以金雞羽插髻女未嫁者以
海螺爲數珠挂頸上諸蠻惟狔獾頗強習戰鬪他時或
能爲邊患

毛奇齡蠻司合誌序云古無土司之名虞征三苗殷伐
鬼方漢武檄駟冉邛莢統謂之蠻其地踞湖貴川雲兩
廣六省自巴夔上下迤及海嶠數萬里溪峒箐篁之中
曰狔曰獾曰獠曰猺曰獞凡數十種厯代迄今各有大
姓爲領袖如北魏冉氏田氏向氏南宋舒氏蘇氏彭氏

楊氏皆雄長其地呼族羣族特未嘗建州司隸銓選耳
有明踵元舊事悉加建設其法倣之蜀漢昭烈授羅伽
李恢爲郡功曹主簿晉帝用興古爨深作本郡太守宋
太祖舉僑人秦冉雄使之自治辰州而推廣其意

瀛環志略

卷二

曰澳大利亞土番黑面披髮裸體食草根
山果結巢於樹予之酒一飲卽醉臥泥中如豕負塗男
役女若畜怒輒殺之

佛說胞胎經云顏色固然隨其宿行宿作黑行色現爲
黑形體如漆宿作不白不黑行色現不白不黑體像一
貌宿行素無光潤色現素無光潤普身一等宿行白色

面貌正白普體亦然宿行黃色面貌黃色普體亦然阿
難是世間人有是六色隨本所種自然獲之是佛典亦
以顏色分人種也經有五而言六者蓋有無光潤之人
卽有有光潤之人疑卽紫色銅色兩種矣此經西晉所
譯或有敍文

萬國史記總說云西人或曰人類大別五種曰黃色曰
白色曰黑色曰紫色曰銅色原其始祖各自不同李提
摩太八星之一總論云全地球之人可分六大族一曰
黃色人族則中國西藏突厥

各書或作
土耳其

蒙古滿洲黑龍

江以北地高麗日本安南暹羅緬甸諸國人也明代又

有突厥人航海至歐洲之東南其子孫蕃衍至今尚存

一曰白色人族又名雅理安族

按雅理安一作亞利安全稱之則曰印度亞利

安因上古時崑崙山有雅理安一種人其苗裔南至印

度者膚色白於印度土人故兼以白人名

按山海經有白民國殆此

類既而西行至歐美二洲紛紛占籍其髮則有黑色黃

色紅色之分一曰黑色人族其居皆在赤道下天時炎

熱蓋皆非洲族類也東以太平洋爲界西以中美洲爲

界一曰半黃半白色人族如古時印度西北之巴比倫

內有亞述及雅

及敘利亞

內有猶太及腓尼基

及埃及國

內有非洲北岸之人

今此

種族類約六京五兆一曰淡黑色人族又名穆來由族

因此種人大半生於新嘉坡附近之穆來由地得名迤東至太平洋一帶皆此族人占籍焉一曰雜色人族之二溯四百年前歐人初至美洲見一種土人肌膚略帶紅色究所從來相傳不一或曰黃人之流亞也亞當從作寓從亞洲轉徙至此其著名之國曰墨西哥曰祕魯以上分六族而歷代以來婚媾可通彼此互爲夫婦有難以斤斤分明者總而論之今之著名族類一黃一白耳

萬國史記卷四云緬甸暹羅安南三國大抵身短色黑面扁體高絕少狡好似頑實黠似憎實勇髮多而黑拔去鬚髯望之若婦人崇奉佛教

又卷三云印度民種類不一相傳上古有二族一曰日
朝一曰月朝並出于天神一說西歷紀元前二千一百
八十年高加索族入西境居印度河旁二千年始拜婆
羅門教造梵字著肥大司此土書一千六百十四年高
加索族與土人戰一千三百年二族媾和通婚一千年
始與猶太通七百七十年始立四司尼加朝傳十世三
百六十年六百年佛教大興五百四十年釋迦卒

近譯古史略有十二族分疆圖十二族者亞各伯十二
子之名號也曰納費大里族瑪納嗇東族亞色爾族撒
布龍族意撒加爾族瑪納嗇西族額發勒蔭族本雅民

族魯本族茹達族

按即猶太之異譯

丹族西默完族

日本北村三郎印度史上古亞利亞

按即亞利安

人種今

日歐洲人種即其子孫印度土人皆爲亞利亞人所驅逐入於山地今日現存

萬國史記云韃靼諸部古稱匈奴羣居亞細亞北方不詳其祖

錢辛楣養新錄卷九云陶九成輟耕錄載漢人八種曰契丹曰高麗曰女直曰竹因歹曰木里闊歹曰竹溫曰作亦歹曰渤海按遼金元三史唯見契丹女直高麗渤海四國餘未詳攷元史鎮海傳從攻塔塔兒欽察唐兀

只溫契丹女直河西諸國只溫蓋卽竹溫之轉歟
周官大司樂敎國子舞雲門大卷鄭注云黃帝曰雲門
大卷黃帝能成名萬物以明民其財言其德如雲之所
出民得以有族類

禮記三年問凡生天地之間者有血氣之屬必有知有
知之屬莫不知愛其類國語司空季子曰昔少典娶于
有蟠氏生黃帝炎帝黃帝以姬水成炎帝以姜水成成
而異德故黃帝爲姬炎帝爲姜異姓則異德異德則異
類異類雖近男女相及以生民也樂記方以類聚鄭注
方謂行蟲也

逸周書王會解有稷慎慎卽肅穢人孔曰穢韓穢東夷別種朱右曾云今朝鮮

江原道古良夷孔曰良夷發人盧見曾曰俞人孔曰俞

穢人地孔曰海周頭孔曰周頭黑齒見山海經曰民亦東

青邱孔曰地名周頭亦海東夷黑齒呂氏春秋曰民亦東

南東越卽閩歐人王曰山海經姑妹孔曰姑妹其

夷人吳自深孔曰自深義渠央林一作北唐孔曰戎之

越之蠻王曰西域圖記曰鉢汗國在蔥樓煩孔曰樓下盧

渠叟王曰西域圖記曰鉢汗國在蔥樓煩孔曰樓下盧

孔曰卜盧盧人西區陽孔曰亦規規孔曰規西申氏

北戎也今盧水區陽戎之名規規孔曰規西申氏

注氏羌地羌不故謂巴人方燭孔曰方燭蜀人方人

之氏羌今謂之氏矣巴人方燭孔曰方燭蜀人方人

孔曰方人卜人孔曰西夷王曰夷山海經康民孔曰康

方戎別名卜人南之蠻云在東胡東康民孔曰康

別州靡朱云史記西南夷傳靡莫都郭奇幹高夷獨鹿

名州靡之屬正義云在姚州北都郭奇幹高夷獨鹿

孤竹不令支

盧曰不字發聲齊語有令支

不屠何

管子桓公敗胡貉破屠何注云屠何

東胡之先按屠何即徒河

東胡山戎般吾

孔曰般吾北狄

屠州

孔曰狄 禺氏

大夏犬戎數楚

孔曰數楚亦北戎

匈奴權扶

孔曰權扶南蠻

白洲

孔曰東南

蠻與白民接水中可居曰洲

禽人

孔曰亦東南蠻 路人

孔曰東 揚

蠻

孔曰揚州之蠻

倉吾

即蒼梧

又曰伊尹為四方令曰臣請正東符婁仇州伊慮漚深

九夷十蠻越漚鬻髮文身請令以魚皮之鞞鰕鰂之醬

鮫鰕利劍為獻正南甌鄧桂國損子產里百濮九菌請

令以珠璣瑇瑁象齒文犀翠羽菌鶴短狗為獻正西昆

侖狗國鬼親枳已闕耳貫胸雕題離身漆齒請令以丹

青白旄紕屬江厯龍角神龜爲獻正北空同大夏莎車
始他旦略豹胡代翟匈奴樓煩月氏蟻犁其龍東胡請
令以褒駝白玉野馬駒駼駼良弓爲獻

倪蛻滇南事略卷一云四方獻令甌今福建建甯鄧今
河南鄧州桂今廣西省城損子未詳產里卽車里亦名
徹里夷音無正字耳九菌山名山海經曰南海之內有
菌山余謂菌蕈之類滇土所宜產車雙聲例得通轉然
則商之聲教已過滇池故以微盧彭濮之人得會師於
埤野矣

閩古古白奪山人集云李龍眠作蕃貢圖十幅各以其

本國人物土產衣冠分別刻畫之珍飾貝裝與胡服不
類大約皆眞臘佛齊暹羅諸種落蓋有宋方域北少南
多龍眠躬逢其盛故摹繪畢肖余按龍眠畫十國內有
兩女國又有三瞳國言此國人皆三瞳蓋不足據

董道廣川畫跋

卷二

上王會圖敘錄云祕閣王會圖蓋唐

貞觀所受貢於四海者也顏籀請比周之王會作圖以
敘傳後世又爲王會篇上之今其書具存可以察也其
藏在王府其副留職方以時參攷盡得四夷服章物采
名號姓名官爵謚命此其所傳也以圖察者堅昆其人
長大赤髮白面綠睛而唐後得其國人形質不長面赤

色耳貫金銀小環王及國人露首卷髮衣服同突厥貂
鼠爲帽又以金裝帽領卷其末與今圖所見異又王會
篇點戛斯本回紇所號本名居勿初屬薛延陀在隋謂
結骨在唐謂堅昆余按此實一聲之轉譯者異文耳賈耽以其說爲證
然堅昆自秦漢有之史記所謂高昆漢書所謂隔昆其
國一也今阿斡謂本國不知有堅昆名相承以點戛斯
爲國自此以上八十年矣嘗經朝貢後爲回鶻所破阻
隔不通中國然則乾元二年回鶻奏破堅昆此其可以
驗也是則點戛斯自是本號非回鶻所命也至於木馬
則異制兩鉄則異俗與圖皆不同蓋百餘年間容有改

制殊禮故衣服冠冕不必盡同至面赤白亦異見髮朱
黑則殊傳而鉄不石遂絕疑有誤字自應圖誤可以論也余
按黠戛斯今譯西書者多作高加索蓋貞觀至會昌此
百餘年間高加索人以敗而西徙而突厥遂居其故地
矣

希臘志略卷一云歐羅巴洲史書耶蘇降生前紀載者
率爲希臘意大利二族事其實歐洲是二族外他巨族
不乏若加利族德族卽是也又云希族雖貴於歐洲加
德等族亦與彼等同宗當未有史記之先裏海東蔥嶺
西有一原族實爲希族意族及歐洲他族暨北印度人

生生之本原又云希人自稱希利尼族歐洲亞洲舉呼
爲希臘希利尼人謂他國人爲巴巴類以其語言不同
徒聽其巴巴煩絮而已

漢書地理志遼東郡沓氏縣師古曰凡言氏者皆謂因
之而立名說文云語多沓沓也遼東有沓氏縣按以語
多沓沓而名之沓氏亦猶希利尼人謂他國爲巴巴矣
俄羅斯人稱中國音近契丹或先通契丹之故猶今日
歐羅巴人以中國人爲蒙古種也或曰蓋真丹之音轉
亦未可知

元祕史云欣都思種巴

黑

塔惕

種兩間有阿魯等種

卷十

三又云成吉思皇帝父親留下未完的百姓有巴黑塔惕種的王台里伯曾命綽兒馬罕征進去再有康里乞卜察等十一種城池百姓曾命速別額台征進去又云綽馬兒罕征巴黑塔惕種其種歸附了速別額台的後援巴禿大王等降其康里乞卜察等三種破其斡魯思種城悉殺虜其人惟阿速惕等城百姓虜得虜了歸附得歸附了巴禿自乞卜察差使臣奏賴長生天的氣力皇帝叔叔的福蔭將十一種國土百姓都收捕了卷四元劉祁北使記云回紇國其人種類甚眾有沒速蠻回紇者性殘忍肉必手殺而噉雖齋亦酒脯自若有遺里

諸回紇者頗柔懦不喜殺遇齋則不肉食有印都回紇者色黑而性愿其餘不可殫記按印都卽印度與回紇種異此以其居回紇國中故以印都回紇稱之耳遺里諸蓋卽大石林牙之遺遺里卽耶律之轉音歟記又云其國婦人閒有髻者其書契約東並回紇字言語不與中國通其僧皆髮寺無繪塑惟和沙州寺像如中國誦漢字佛書

福慶志異新編云音底西域一國也在葉爾羌西南馬行六十餘日其地富饒多寶貨時與葉爾羌交通貿易攜內地瓷茶大黃而去其人深目高鼻多鬚而非回子

種類飲食無所避忌言語亦不與回子通衣帽則與回子無異而右衽其國敬牛家一頭築精舍以處之男婦朝夕禮拜祈禱默佑金鑲牛角蹄披以文繡飼以膏粱滌器必以牛糞拭之以爲潔而後貯食所居屋宇田園所耕米麥瓜豆皆與回地相似但入回地見殺牛則痛詈之以爲非人類也余按音底卽印度之轉音此所記卽劉祁北使記之印度回紇也婆羅門教牛犬之禁最嚴故以殺牛爲非人類西陽雜俎卷十三云北虜之先索國有泥師都二妻生四子一子化爲鴻遂委三子謂曰爾可從古旃古旃牛也三子因隨牛牛所糞悉成肉

酪鄒犛風俗攷云印度內地古有敬牛之俗以爲牛係
天神寵愛特降人間每族必公選神牛一頭建廟祀之
神牛糞溺寶若神丹良辰令節各人染牛糞於額謹拜
牛廟家中祭祀亦必供設牛廟以表其誠余按婆羅門
言天神化牛實非人類攷見前卷柯古所記略得其似福慶
鄒犛徒詫異俗未能深知其本來也西陽雜俎堅昆部
落非狼種按元祿史蒙古自稱爲狼與鹿種其先所生之窟在曲漫山
北自謂上代有神與牯牛交於此窟其人髮黃目綠赤
髭髯按此則堅昆亦自言爲牛種

惠州府志云蠻不知所自來惟麥何濮蘇吳五姓毛大

可蠻司合誌卷十五云蜚戶在雷廉間盜珠爲生酋長
不一有蘇連陞周才雄爲二酋其先皆安南夷欸石城
塞願爲臣僕因得充蜚戶又有他酋曾國賓以三十艘
入海萬歷改元犯北海則蜚實不止五姓誌又云韓愈
詩龍戶馬人龍戶卽蜚人一名崑崙奴余案崑崙奴專
屬巫來由種與蜚戶稍異毛云其族分三種能入水取
魚者曰魚蜚取蠔者曰蠔蜚入山取材者曰木蜚今蜚
皆水居其木蜚一種未聞

漢書敘傳云西南外夷種別域殊

李鍾珪新嘉坡風土記云自暹羅直南伸如舌長如股

中有山如脊斗入於海皆巫來由種人居之西人統名之曰下暹羅其國有十曰斜仔曰大坤曰宋卡曰大年曰吉連丹曰丁噶奴曰彭亨曰柔佛在山之東曰吉德曰沙刺我在山之西地至柔佛盡處裕衍一水隔二三里而得一島卽英人所謂新嘉坡也舊名息力又稱咭叻攷之古冊斜仔以下皆頓遜地其後析爲列國而柔佛處極南叻地屬焉又云巫來由人通謂之土人有書作穆拉油者按粵人急呼則曰馬來閩廣人讀無爲莫之去聲故巫亦讀穆自印度一帶來者謂之吉靈人又有白波斯來者謂之齊智人土人有黑有白吉靈齊智俱膚黝如

墨其以布蔽下體不衫不袴三種人大略相同

酉陽雜俎卷五云馬伏波有餘兵十家不返居壽冷縣

自相婚姻有二百戶以其流寓號馬流衣食與華同山

川移易銅柱入海以此民爲識耳亦曰馬留余案馬流

馬留皆與巫廣州音巫讀謨來由音同來由之切亦卽通典之

文廣音文郎是此種人早見載籍矣按酉陽雜俎說本晉俞益期交州箋

日本北村三郎暹羅史云暹羅人口六百萬眞暹羅人

二百萬其他支那人百萬羅施原作才入人二百萬馬來

人百萬

王澣瓠園集楚遊篇統志云黑龍江在開原北二千五

百里按驛程京師至開原衛一千九百餘里自開原以外道里莫考舊志殆約略計之馬端肅東彝記略云永樂時以大甯之地自古北口至開原立朶顏泰甯福餘三衛處酋之附近者又以開原東北至松花江海西一帶金之野人女真分爲二百七十餘衛所皆賜印置官間亦以野人之向正者爲都指揮都督統之而松花江東北一月之程所謂黑龍江之地又立奴兒干都司按朶顏三衛蒙古皆元之遺部海西女真則金之別部在開原一帶塞外所謂南關北關是也野人女真最遠黑龍江殆亦野人之地耶余謂蒙古女真之別卽漢魏匈奴

奴鮮卑之別也野人女真則遼史所謂生女真耳曹廷
燕密探俄界筆記云雙城子爲古肅慎國地亦爲女真
部地唐爲北沃沮明爲建州衛野人衛交界之處國
初屬瓦爾喀部

宋邵伯溫聞見前錄卷十三云吐蕃在唐最盛至本朝
始衰今河奉邈州青唐洮岷以至階利文政縣州威茂
黎移州夷人皆其遺種也獨唃囉一族最盛雖西夏亦
畏之朝廷封西平王用爲藩翰陝西州縣時置驛謂之
唃家位

御覽

三百五十六

引廣志曰獠在特柯與古鬱林交趾蒼梧

皆以朱漆皮爲兜鍪

按北堂書鈔一百二十二引廣志云犬戎以朱漆皮爲兜鍪豈獠卽

耶犬戎

陳眞諦譯如寶論云譬如有人立義一切樹有神識何以故樹能眠故譬如尸利沙樹有人難言樹神識不成就何以故因不徧故一尸利沙樹眠餘樹不眠是眠不徧一切樹是故眠不能立一切樹有神識按西人近攷植物皆有睡性是植物皆有神識也日本人攷公孫樹卽銀杏由精蟲而生則其有神識宜矣牛亨之問張茂先記之宜哉

陳釋眞諦譯佛說立世阿毘曇論第一云有諸外道作

如是說是大地界恆去不息此事不然若實爾者如人
擲物應落後又諸外道作如是說是大地界恆墜向下
此事不然若實爾者如向上擲應不至地又諸外道作
如是說日月星辰恆住不移大地自轉疑是天迴此事
不然若如是者射不至壩又諸外道作如是說大地恆
浮隨風來去此事不然若實爾者地恆併動按此以物
落及擲物射箭證地之動靜雖當時未詳吸力之故而
柰端得悟於落果已開其端至云大地自轉疑是天迴
則三百年來遂成定論矣

數量品第七云佛告富婁那比丘是世界地形相團圓

如銅燭盤如陶家輪是世界地亦復如是猶如燭盤邊緣隆起其鐵圍山亦復如是譬如燭盤中央聳起其世界中有須彌山王亦復如是按此佛說地圓之理以此推之則須彌山固卽指崑崙也

唐釋湛然法華玄義釋籤第十六云天文者如孔子有三備卜經上知天文中知人事下知地理按隋經書經籍志五行類有易三備三卷又易三備一卷當卽三備卜經又有顏氏撰周易孔子通覆決三卷

蕭吉五行大義卷四引孔子元辰經隋志有孝經元辰元辰歷等書不言孔子撰曲禮醫不三世正義三世者

一曰黃帝針灸二曰神農本草三曰素女脈訣又云夫子脈訣

大智度論第四十八云日月歲節者日名從旦至旦初

分中分後分夜亦三分

按佛家六時禪誦卽此六分

一日一夜有三

十時

中國以漏百二十刻爲記以四約之則爲三十時

春秋分時十五時屬晝

十五時屬夜餘時增減五月至晝十八時夜十二時十

一月至夜十八時晝十二時一月或三十日或三十日

半或二十九日或二十七日半有四種月一者日月二

者世間月三者月月四者星宿月日月者三十日半世

間月者三十日月月者二十九日加六十二分之三十

星宿月者二十七日加六十七分之二十日閏月者從日月世間月二事中出是名十三月或十二月或十三月名一歲據此則印度歷亦置閏與中國同今歐洲所用太陽歷卽龍樹所謂日月也

說文戊字云象六甲五龍相拘絞也注家於五龍多不得其解余以爲甲象人頭乙象人頸丙象人肩丁象人

心則戊正當象人五藏耳然苦不得證據及闕止觀輔行傳弘決第六之二云如下第八卷引博物志謂勾芒等升

天曰五雲化爲五龍

按卷八引博物志東方木其獸青龍南方火鳥朱雀西方金獸白虎

北方水獸玄武中央土獸黃龍

心爲朱雀腎爲玄武肝爲青龍肺爲白

虎脾爲勾陳是五龍正與五藏同義

水中有極微細生物釋典屢言之後魏般若流支譯破

色心論

一名唯識論

云微細亦應見者此句明何義若彼青

等是一物者於彼水等諸青物中有青色等麤細諸蟲
以何義故但見麤蟲不見細蟲是故偈言微細亦應見
故今時西人以顯微鏡測之而見一滴水中生物巨萬
乃天親智照如實而知固知性相諸宗足窮造化之眞
理已

唐一行大毘盧遮那成佛經疏卷四云諸執者執有九
種卽是日月火水木金土七曜及與羅睺計都合爲九

執羅喉是交會蝕神計都正翻爲旗旗星謂彗星也按
九執歷之名卽用此義

純常子枝語卷三十四